

钦定四库全书

集部六

太白山人漫藁

别集类五

明

提要

臣等谨案太白山人漫稿八卷明孙一元撰一元字太初自称秦人或曰安化王孙也尝栖太白之巔故称太白山人又尝西入华南入衡东登岱又南入吴与刘麟吴琬陆昆龙霓称苕溪五隱晚而就婚施氏遂卒于吴兴麟为文以表其墓一元才地超轶论者至以王猛之流拟之其所为诗排奭凌厉往往多悲壮激越之音读之极伉健可喜朱彝尊至谓其瓣香在黄庭坚持论虽不免稍过然当秦声竞响之日而能矫然拔俗如此亦可谓独行其志者矣明史艺文志载一元太白山人稿五卷此本为崇祯中湖州周伯仁所刻凡八卷盖据吴兴张氏本及阳湖本而合辑之者原录于八卷末尚标有补遗若干首而卷内无之盖当时有志搜访而未得也闵元衢欧余漫录载一元逸诗有送许相卿诗一首见许氏谱题王伯雨园亭二首见乌青镇志和吴甘泉诗四首重遊一首君马黄一首见真迹饮马长城窟一首见卢志庵所录续于纪宣符家得十四首又称鲍稚■〈山上〈弓攵〉下〉家有其诗抄约千余首则其散佚亦多矣乾隆四十四年正月恭校上

总纂官（臣）纪昀（臣）陆锡熊（臣）孙士毅

总校官（臣）陆费墀

●太白山人漫藁目錄

卷一

古乐府

卷二

五言古

卷三

七言古

卷四

五言律

卷五

五言排律

卷六

七言律

卷七

五言絕

卷八

六言诗

七言絕

●刻太白山人漫藁题辞

孙太初先生以超軼絕世之才游半天下卒卜居于吾湖考其年仅三十有七而当时之伟人杰士无不折节下先生若得交于先生为幸者没之日各分任其平生所属使无复有遗憾非有一段不朽者沁入人心奚以至于斯余生也晚不获炙先生但见湖之先荐绅大夫及耆旧之士每啧啧称先生为畸人至得其诗藁中片纸只字无不寶为弘璧天球也者当年诸刻惟余外家张氏本称善而歲久业荒悉以饱蚊鼠之腹有心者伤之长儿仁偶过舅氏从零落中见其仅存者什之一因觅其原本又从友人处得阳湖本合为补葺并传志叙言彙成一集以流布海内俾海内之慕先生者知先生之诗瓢犹有在而当时刘元瑞郑少谷李空同诸君子所以表章先生者令千载如见云藁曰太白山人存旧志也崇禎己卯春日吴兴周中度身为父题

●太白山人漫藁序

太白山人漫藁者吾友孙太初所为诗也夫曰漫者触而成声无谓有谓之云也太初關西豪杰也束髮入太白山为山人继入终南泛观恒岱遵龟蒙慕宣圣遗韵止于邹鲁之邦久之踰江淮下吴越鶡冠布袍独立于万象之表志予如也夫高踪远影者顾以世为不足为乎及读其诗皆悲壮奇崛感激奋发而卒泽以中和如神龙在渊变化不测得时而兴乘云雷而雨天下噫是岂忘情遁性为犁耨耒耜者伦乎或曰太初离亲戚去坟墓遠游于方之外与名教或不相蒙者是何言哉孔子曰丘也东西南北人也复欲居九夷严子陵去齐适越管幼安徙于辽东孙明复隐居于太山之阳邵康节去家入洛四十而后娶古之贤达流寓于外要必有所为而安焉者独太初尔邪或曰吴越之人右文人易致名誉太初操觚饰智扬扬然为高意有终南之捷者夫以太初之才稍自抑以应今之世何往弗达顾甘心寂寥卒其世以飫无端功名邪吾尝与太初乘月泛洞庭浩歌渔父傲睨一世若无少芥蒂于其怀又尝与卧西湖之上见其息深深时乎天长时乎地久要固有道者吾闻无欲而后应世今之应世者可胜议哉漫藁凡若干余为之序以传藁而曰漫则固传也太初不与也正德戊寅歲春二月少谷山人晋安郑善夫书

余序太初漫藁成太初曰子真知我者又明年庚辰而太初死遗命以漫藁必付余余归吊其庐抚其孤携其藁至杭梓而行之凡与太初游者如杭人许台仲陈遂初高世美湖人施邦直沈仁伯徽人程世大孙道甫戴仲良率来集事于乎使太初复生诸君当不愧其平生之言乎是年秋七月望善夫志

●太白山人漫藁序

太白山人漫藁成予友少谷子以示予于胜果寺俾序之序曰吾读太白山人诗而

知吾越山水之盛也吾闻山水能生奇人矣太白山人秦人也入吾越时未有诗名久而渐张公卿方伯连帅之尊輿阜优伎之贱无弗知有山人者吾越山水之助也夫寓吾越者多矣而何独一太白山人乃得其助盖山人以其雄壮浑厚之资肆之以诡怪佳丽之观若甘和白采之合美故其诗往往为人所传而予固知其必传于后也夫既能生奇人矣而奇人自外至者复能留焉留之者与生之者等也故因以知吾越山水之盛又曰太白山人江湖间不可无也漫藁之刻太白山人不可无也有太白山人然后重江湖有漫藁然后太白山人重少谷子之意也今之神山人者曰山人长髯白面玄谈静养决非凡骨真仙或可成也器山人者曰山人宏才广识知兵晓吏事使之用世当若古之王猛者流而惜其流落不偶也有鄙山人者曰山人岂无父母妻子亲戚坟墓而乃溺情忘反也山人愿学林逋矣而何卒取少艾以自污也棠陵子曰太白山人不可鄙也神之者诬矣器之者或未必然也江湖之间不可无也予尝遇山人于姑苏之台窃欲友之而吏事牵矣山人于少谷子尽读交游所赠而曰独心伏于昆山予尝感其知而再会无由矣然有待也盖高明之士一变必殊绝吾及其变而友之当有得矣呜呼已焉哉又曰太白山人已矣能使少谷子收其藁以传又能使刘元瑞诸君子治其后事予友吾惟可崛起之士也而于山人每心伏焉殷近夫余畏也而畏山人皆有忘形刎颈之意呜呼山人可谓得豪杰之心者矣夫用世者在先得豪杰之心然则太白山人虽谓之用世之才可也

正德十五年闰八月二十日棠陵方豪漫书

●钦定四库全书

太白山人漫藁卷一

（明）孙一元 撰

○古乐府

拊剑篇

天风扬蓬海水啸波白日惨光严霜被柯【一解】

广野千里豺虎滋多朝无英雄守土奈何【二解】

余本秦人久客吴中楛矢不忘志念忡忡【三解】

十年无家被褐不完拊剑长视歌声无欢【四解】

自君之出矣二章

自君之出矣冷暖何所依不能见君面但见篋中衣

自君之出矣生死那可知不能保君身但保襁中儿

边人曲

燕山风高白草枯月明何处夜吹芦边人戍久不忍听泪湿腰间金仆姑

雉子曲

麦穗长雉子肥雄啄雌依依迎风鼓双翼吐绶烂锦翬鸞鷟以为俦鹰鹯远相飞
愿哺尔雏愿戢尔衣不近齐人终无祸机

解所佩日本小剑遗殷近夫作公莫舞

晴空一夜走白螭河鼓下照寒江湄葛卢之山元气裂神物将化天有为鐔头惊见
赤花古轳轳纯钩皆莫数千年碧血磷火明万里阴风髑髅语帝王气象佳葱葱玉虹提
携行相从座上酒酣公莫舞要是当时隆準公

杨白花

帘幕闭重重六宫春已暮金梭万丈丝不挽杨花住

班婕妤

纨扇歌初歇开帘草又新如何双燕子占断六宫春

郎住竹棚口

郎住竹棚口妾住杨柳■〈田奕〉杨柳丝空长不能系郎船

驱车复驱车

驱车复驱车起拂车上露愿作车后尘逐君车轮去

古别离

有酒复有酒饯子河梁路离情不可整风乱道旁树

雉子曲二章

花叶正田田雉子行哺雏锦翬覆满身相顾还相呼圣人在位民用和只今四海无
网罗

花萼正离离雉子行相求饮啄青山下雌雄鸣且酬四座沉沉动欢酌堂上何人奏
此乐

吴女词三章

开帘示晷欹剪花金刀冷脉脉情转深谁牵轳轳绠

当牕织锦字抛梭声咿哑阿弟不肯闲拆我牵牛花

燕尾剪空寒花苞纔小吐吟成春恨词隔窻教鹦鹉

倦倦林中鸟二章

倦倦林中鸟羽毛随所依风霜太酸苦肯念身不肥

倦倦林中鸟一枝聊卑栖鸛鸛不我昆鵩鵩莫我嗤

春江曲

家在银塘住微茫隔烟雾春水新生偶没篙鸭嘴岸崩人不渡问船尽日澹无归拥
衣夜宿青汀露

采莲曲二章

越女颜如玉和歌行晚风举头乍相识棹入莲叶中

莲叶翻乱红正在若耶曲愿见隔溪上对坐斗眉绿

太白山人漫藁卷一

●钦定四库全书

太白山人漫藁卷二

（明）孙一元 撰

○五言古诗

杂感八首

白日下悲泉瑟瑟寒风鸣羣芳悴中野岂不怀孤英冥运有兴没主者亦何情謁来南荣赧还当抱此生

棘冈生广庭出入良嶮巖驚驚不遐顾昆仑安可期偪侧居人世感此末岁悲去去勿复道悠悠祇自知

太古固无言有言淳朴丧诗书已失真龙马终成象身生羲皇后心在羲皇上万事多变迁真宰自无恙

中古造无射耗财空备器元声未拟和佞言满朝市所以百年来戎马无粪地畎亩事征伐土风转颓至安得虞舜弦为我理六气

大道无狭邪全德万物备白日浴咸池悠然会此意熠熠争微光鷖鹄矜小智欲辨已忘言沧溟浩无际

抱易住青山长日青山对烟云散不收晨昏变奇态应知住山心不在万物内乾坤古神器机运谁谢代以道猎众能兀兀意独在归来南郭翁天根同一慨

昔年云中士被褐离尘表相逢契夙心结我平生好临别海门东赠以玄芝草殷勤再致辞教寿浮丘老至今不敢遗终身愿持保但恐风雪深与时同枯槁

齐州赴宿诺沧海归茆庐浴髮清泠中沙月动影虚天风飒然来吹我白菟裾手持古松枝朗读鹤背书轻身炼五芽去与元化俱

江上逢春感兴

严雪散寒雨坚冰开积霰青阳变修条东风回旧林节物感孤志连翩春江浥椒花远自媚清尊强费斟十年一被褐百回结尘襟岂无乡關念所愧国士心开匣抚神物床头流泉音冥运诚嶮巖履兹思何深不徒一朝奋要在万物任清诗继絕响聊此抱膝吟远遊

海水照髯影天风吹角巾早年负奇好五岳散闲身日观倚高寒车箱梦犹真一笑谢尘世采药青涧濱偶来不解事长句惊四垠几年闻格斗中原白骨新山鬼夜啼血层云愁高旻青凤叫孤月茫茫鼎湖春攀髯不可得终岁泣遗臣

读高士传

钟鸣山阁静晨起自栢头霜树被繁实日出红欲流稚子裹糗粮下涧汲寒湫焚香开卷帙静坐法前修因看龐德公鹿门真可求

靖江西浦与殷近夫别

离节动青郊高筵敞江濱哀觴为欢酌温念忘客身连山瞰水陆平明眇烟尘清曦升木末长风吹远津桑麻接上国炎海为南邻生聚岂鹿豕行当逆龙鳞结交非在多要

得允衷淳古来豪杰士寄托各有因患难苟相得谁论骨肉亲政当笃明爱安可辞苦辛
结此园中草炯言怀好春

春日吟

地偏无往来空庭春正深会此淑霁景花木弄繁阴去去散芳躅风来吹我襟意得
不能语野鸟酬好音翛然遂忘倦尽力还幽寻纖纖孤月上迟迟白日沉呼来林居子还
当期此心

东门行

晚出东门道停车望眼舒悲风横空来瑟瑟吹我裾芳华尽销歇杞枳生郊墟我前
跑野■〈豸 穷〉我后号山狙无家问乐土八九村疇虚饥民抱子出野哭还趑趄他方
尚格斗盗贼骄有余四海困转役人命化为鱼有魂招不得剪纸满沟渠涕下漫沾巾幽
怀何时摅

与甘泉老人入董■〈山奥〉山

天风下高木寒日堕苍苍对坐青崖底卸杖白石傍瓦甌出泉味布袍受松光云霞
有古好芝桂永相将还携韩终辈去访蓬山阳

访樵者

远寻山中樵不识山中路隔林伐木声遥忆林深处不晤竟空归日堕西陵树

江上饯别友人四章

晨起促征鞍薄言驾舟楫送子赴修河不忍与子别兰荂会摧残芎蔓不堪结凄凄
情未宣惻惻心欲折

心折慙洲渚玄云构重阴慷慨抚时序况此离别襟嘈嘈伫繁吹戚戚理哀琴暂延
林莽间睠此念弥深

念深重离筵含酸听我歌天寒冰渐结君徂当奈何穷兽不出藪倦鸟岂离柯期子
早归来岁晏守山阿

山阿遵时晦人文会陆沉履运多嶮巇感念昔与今凄风振修薄严霜被乔林愿言
同此夕寤寐思所钦

送周用宾进士访道入少华山【有引】

尝闻齐人安期生以策干项羽羽不能用欲封之侯不受遂亡去予谓古之仙者往
往皆豪杰辈为之友人周用宾弃官访道入少华山予喜安期生之风感激于斯人因作
是诗以送之

沧江望不回孤峰晴自立猛虎啸天风肯为人所縶尝闻安期生画策君未入归来
谢烟火清露中天吸千年玩弄间人世风云集坐此无穷门灭景炼玄汁

山中石菖蒲雨过忽开九花喜而尽采食之

山中一雨凉窻前晓气清菖歎忽开花一叶冒九英文石带浅碧照我几簞明尝读
古仙传此草天之精出有灵物护时见云气成上帝怜我苦服之令长生玉杯收玄露采

花浮轻盈但觉五情好旋茹毛骨轻便当谢人世去去东蓬瀛

种松

种松满昆丘眼中生苍鳞松根化为石松叶不受尘中有结庐者长年事隐沦入云
荷长镰斲苓青润瀕木食有奇志乃与天为邻放歌白云里去去空山春

田舍早春作

今辰初解冻远望田苗稀日出会羣情鸟雀相喧飞村妇荷锄至隔舍烟火微阿童
三尺捶驱羊散柴扉风来广郊陌春事正依依

侣鱼

清池耀明镜绿萍净相依水面散寒花树底风生微主人时夕来释杖坐苔矶丛石
围小岛游鱼吹浪飞眼中银泼刺鳞光乱斜晖物我澹无言相对两忘机余亦观化者愿
与子同归

收菊花贮枕

呼童收落英晨起晞清露满囊剩贮秋寒香散庭户夜来梦东篱枕上得佳句

秋夜同紫峡逸士雪江老僧輩十人宿南屏山中诵逋仙夕寒山翠重秋净鸟行高
分韵赋诗余得夕字

荒烟散不收残山带遥碧林鸦晚依依草雉时嗚嗚斜光明不定居人掩荆栅謁来
喜盍簪林下语幽磧厓屋灯火青野蕨旋新摘岂无伏虎禅亦有飞鳬客爱此小昆丘人
世白云隔愿当抱奇幽炯言永终夕

江上送殷近夫奉母东归

春色满汀洲沙晴鷗■〈勅鸟〉游故人别我去回首江之隈半月届水宿挂颿风
力柔芳蘅弄遥碧闲云澹不收遠见蒜山月晚泊琼花洲推篷慈颜喜得鱼沙市头人生
会有别欢聚不知忧平明望齐鲁乘流发棹讴

我爱陶弘景

我爱陶弘景不受万乘束挂冠事栖遯归来卧空谷青山读玉书白鹤下高木乃知
悟悦心长日云相逐

我昔何所梦

我昔何所梦所梦在南箕下骑苍麒麟被髮浴天池日月相磨荡雷电为争驰鱼龙
舂撞死风雨失所师苍水使者怒九潦丈人知长跪告丈人臣实愚以■〈言坐〉愿当
谪下土广轮受谴羈手持青藜杖濩落无所之朝投昆仑巔暮宿渤澥涯腥膻厌尘土所
过多魑魍沆瀣不自饱五内常抱饥浑沌日斲丧颜色非旧时翩翩黄鹄鸟相望不相随
空懷云锦字无由报归期

王野云见寄华山志忽忆余曩昔月下着羽衣醉吟莲花峯上今已三载自过江南
无此豪兴喟然而叹作诗寄谢故道及之

忆昔游上清长风吹羽■〈ㄗ 夜〉仙人九节筇扶我莲花侧太空借韶濩羣动声

相吓石髓酌天瓢此物山不惜醉倚洗头盆月华凝欲滴独鹤惊夜半回首秋云碧三年
万里游此事堕今昔媿谢山中人默光运阖辟

与杭东卿宪副论宋人诗

勃兴黄九穷妙处空自知坐海不用舲孤啸三山湄迩来几百载还受世人嗤平生
陈正字白首不相疑入门坐盘礴知有古画师

紫阳山中徐步

穷壑卧孤松寒风生杖屨幽人独往来鸟啄自成句因山剩得秋欣然有余趣片雨
弄江光孤云起汀树望中水似天啸坐渔舟去

云居子

龙山有高人结茆乱云里爱云不出山自号云居子晨夕餐云腴眼中緑筋起十年
不见人偶逢青嵯底古心仍古颜相看不作礼但问何处来翠靄湿芒屨予亦澹忘言笑
拈金鵝蕊

程节妇

君身倚桐枝妾身葛藟草相感纏绵意永言百世好一朝讎摧伤妾身宁自保生死
愿从君寸心日杲杲不学浮萍花东西荡风沼

吴兴北亭与邦直别

青松盘巨壑不受人间尘鸞雏异众鸟自饮砥柱津羣情贵苟合难以保厥眞吾与
夫君交终始道相亲同撝云中草还寻天上春一朝来告别去作上国宾正值歳时暮况
与豺虎邻咽涕重感伤手挽君车轮寒禽各啸侣落木亦悲辛惟愿君归来卧此清涧濱

寄斗笠翁【有序】

予往年在山阳时有客斗笠短褐访予于山中因与坐古梅树下竟日视神气超然
了无酬对一笑不别而去予意甚竒之今年甲戌孟冬八日有逺客至忽寄一诗云忆昔
山阳时访君古梅边青山不隔云飞来满座前风格正堪似气味亦相连竟日不作语此
是象帝先自从别君来想象山月圆恐君为世用堕落天亦怜海上若木枝岛中玉禾田
引领候君归寄此黄泽篇乃海门罗先生耳予即惘然感悟作诗从此逝矣

往年斗笠翁相对空山里坐抚古梅根眼中苍鳞起景象入无言玄冥乃至理别来
经几年梦想隔丹雘昨得白云词披览忽惊喜重感至人心涕下悲未已若木与玉禾一
望几千里挥手谢尘凡长往从此始高歌碧云回一剑驾海水

闻刘元瑞按察使弃官与甘泉山人候久不至南国有高人弃官万里道晨夕问音
书相候青林杪歳暮悲风尘会晤苦不早何日入门来捋须倾怀抱东山吴居士况汝平
生好謁来同幽栖笑拾金光草

三隐逸诗

严子陵

子陵太公流垂钓迹相似一朝载后车尚父任国事陵也帝王师谏议非所志桐江

一丝轻烟水从此逝文叔惟故人侯霸乃奴隶高踪邈难攀清风满天地

徐孺子

刑人弄神器汉道日将覆羣贤抗大义机露身先戮矫矫南州士云卧匡山曲高鸿
眷青冥潜虬媚幽独竭来世可遗力耕食自足四海吊黄公千里刍一束下榻走陈侯身
尊道不辱邈邈有斯人千古仰高躅

陶渊明

渊明豪杰人出处亦有道昔读荆轲诗仿佛见怀抱晋室渐陵夷一官非所好刘裕
乃何人天意亦草草归来卧浔阳甲子纪年号酒乃寓真情菊也见孤操

梦遊黄山吟

朝看黄山图暮梦黄山行手扪天都月一笑云烟横丈人眉如霜采秀忻相迎酌我
以石髓遗我以琼英冷然跨黄鹄更欲遊空明羣峯忽不见一举还自惊觉来发长叹半
牕松雨鸣

曾大尹世荣馈江鱼

平生味道腴藜苋心自足邑侯念此意远馈春江玉惊犬吠成羣打门走健仆雪花
初出水鸾刀破银腹风味极不常更倒床头醪隔座目力穷到手杯盘速麤粝得解围吟
声动花竹

石川子

鲁门有狂客昔隐泰山中高谢九州岛事自筑一亩宫鹿裘才掩骼悟悅晨夕同饮
牛汶水湄访道尸乡翁物情视蠕动长啸回天风偶来遊汗漫邂逅瀛海东语笑若宿好
顾我启方瞳授我玉屑饭五内烟火空久当遗凡蜕相将入无穷

赠钝翁

丰狐自胥疏每为腋所悞翡翠巢南林亦以文见捕世人玩葩藻投老终莫悟夫子
抱清浮以钝守中素还能遠器声竭来随烟雾予亦畏垒民从子返初步

春日闲居和韦苏州

乱髮午未梳稟居幽兴生焚香了清昼无梦到京城雨过山枝绿倚枝有余情舍南
村水满鸛鳩声催耕地僻语论稀床堆图史清竭来坐成懒那知世网婴

题许氏夫妇节义

夫因为弟死妇乃守夫节一门节义俱声光继前哲呱呱膝下儿衣食頼提挈夜窓
机杼声孤灯半明灭白髮映青裙投老志愈烈磊磊涧底松凛凛岩上雪感慨歌此诗灯
前声呜咽

赠别王与时方伯

海中三花树石上五粒松与子今有约相候寻其踪褰衣白云杪时戏苍精龙手把
古苔篇还访昆仑峯峰顶咽玄露长令有好容回首谢尘世莫教生秋蓬

梦采药王屋山小有洞

夜来何所梦所梦在名山采药小有洞长铗乱云间忽觉异人境已知自不凡青厓
贴天日下照芝草斑双辕驾白虎遥见仙人还向前心自喜飞步相追攀手把翠云盖
求启秘闕长日不肯语相待神自闲但教食云霞要留好容颜一笑还自悟白日遊尘寰

首夏一日坐钱员外仕宏竹间小楼戏简

首夏鸣禽繁晏坐竹间楼天风洒琳琅碧云衣上流焚香了长日短童具茶瓯枕簟
对青山顿觉五内幽地僻不受尘主人更清修何当拜龐老同入鹿门游

张山人

张子湖海士弱龄自崛起读书法前修隐栖茆茨底旷哉山水情鷖冠乌皮几岩花
纷始红石耳翠还紫触物发幽响清诗有妙理远虑累可轻遗荣心自喜缅邈山中游百
世懷杖履

送潘子北上

潘子南中秀意气凌飞鸿出门佩双鞬告别时匆匆驾言游燕赵览光蓬莱宫杖策
谒天阙危言开帝聪上以陈王道下以陈民风慷慨抗高义披肝沥其衷予亦魄礪士失
志岐路中长剑拂鞶厉侧睇心冲冲愿子茂大猷寤寐思所崇

题程时望介斋

新安昔上郡黄山秀而起程氏重黎后居此古仁里异代见孤操眼中得吾子结茆
山之隈行歌青涧底饮泉义固在饥冻未应耻千载于陵翁可以同此理

题汪庸夫孙道甫道义同心卷

两两涧底松郁郁歲寒操青青百尺丝上有女蔓草女蔓不终好一夜风霜老

太白山人漫藁卷二

●钦定四库全书

太白山人漫藁卷三

（明）孙一元 撰

○七言古诗

松树障子歌

眼底何人画松树一株两株拂烟雾青入石泉形影空老摧岳壑愁日暮山鬼作灵
夭矫行于菟受缚却回顾摩挲双眼看不真恍然步入庐山路气寒心悸狂欲踰仰面大
叫真宰怒雷霆排空顷刻成茆堂却被风拔去停杯収卷起长嗟四壁秋声雨如注

畫孔雀引

吴溪大绢长十寻何人夺此造化心不写凡鷹与快鶻独写青山石上之文禽高冠
照水弄深碧翠尾隔花浮暗金文章真合自妩媚雌雄长日青树林君不见杜陵诗中语
意深见诗对画如见箴赤霄玄圃湏往来慎勿渴饮寒泉阴

咄咄行

太白山人愁咄咄洒泪盈把眼见骨夜深按剑灯荧荧出门万里天突兀长江老龙

作人语荧惑正照江之浒短衣蒯缞节士歌破屋阴风动环堵蜀之剑阁国西门■〈豸契〉
猷久据扬风尘竖儒几年秉旄节民命视同鼎中鳞忆昔孝皇养士恩银章朱绂出入尊白头至今坐通籍急难谁肯排天阊呜呼此事难再举君臣大义从斯■〈度支〉
回首欲投烟雾深钓竿独抱沧溟去

酒酣歌赠郑继之地官

司徒之官不可求早年通籍金闺游青袍只今厌奔走儿女衣食泣道周屡见文章出翠釜未闻廊庙登天球乡闾万里望不及风吹离思江花愁野人勤汝早归来尘埃肮脏难为俦朝廷嬖孽未除尽早晚尚有巴蜀忧冰雪照野惊岁暮行人烽火多阻修天狼出明东海岸哀凰独叫西康州酒酣对汝不料事为此长歌歌未休

黄山行

黄山昔云与天通三十六峯常冥蒙晨昏日月转地中下连沧海沃焦东暎阳一足啼远松天鸡野岸巢高风中有灵迹世难穷洞门水帘卷郁葱五色闪映金银宫秋风花落青桂丛闻有高人秘其踪洗药流出砂泉红长年兀坐石床空万物入手愁化工吾闻此山元气鍾异人往往时相从苔篇鸟书云雾封我来启此心忪忪洞里韩终倘相逢倒景同佩苍精龙万二千年寿无终

山中人歌

山风日暮吹黄独山人归来山中宿白云万顷高映屋山光相对眉髮绿万物到手吟不足诗草床头牛腰束麋鹿相过亦不触毳袍芒屨识高躅上皇之时道超俗吾闻不死游亭毒我今炼药山之麓山中之人驾黄鹄

剑阁行寄彭济物总制

老子轻裘豪且雄挽弓射龙江水中落日半壁翻江赤巫峡明月啼■〈豸员〉
狻中原一髮渺何许峨岷万里来秋风古云剑阁罪真宰盗贼窃据今无同地生度量固人力全活民命天为忠健儿倒戈喜多梦归来散马关之东燕然铜柱亦细事致君尧舜臣之功野夫甘守西山饿再见庶物回冲融庶几乎再见庶物回冲融

松厓歌寄方方伯寿卿

吾闻徂徕之山巖巖高万丈上有古松千尺蟠踞厓之顛白日行天不到地苍藤翠葛倒挂相钩连皴皮剥落根半露偃盖反走枝相纏下有元精山灵秘流膏入土今千年樵人牧竖不敢伐乃知神物天能全阴厓半夜起蛟螭哀壑万里含云烟世间此木不见用偃蹇独卧空山前只今大厦将倾圯风雨无庇真堪怜呜呼安得此木供采用能令四海苍生重熙然

南屏山歌

屏之山兮高且闲云冥冥兮水潺潺山中人兮古心颜坐白石兮擷翠菅双鸟忽兮翻飞念尘世兮多违夕阳下兮千里眇怅望兮不归

吴氏双桂歌

吴家轩前有双桂虬枝曲铁相交蹉黑飙一夜鬼神会天香堕地愁素娥露霭向晓
半身湿烟痕翠剥莓苔多迩来更借栽培力开花无数黄金柯君家兄弟好奇古携我共
坐青婆娑月色轻摇白鸾箎秋光浮动金叵罗气酣耳热发大叫仰面不怕真宰诃寒蟾
无语玄兔泣一泓翠影摇山河相看一笑唾壶缺揽笔赠君双桂歌

题梅花赠太守黄子和

使君作郡沧洲边我曾一见神翛然长髯方瞳有仙骨种梅犹记罗浮巅琼盘铁曲
一万本茆屋正在春风前寒姿自照日杲杲白鹤下叫青溪烟我归管领君勿嗔采花拾
实还候君

南荣老人歌

南荣老人睡起晚过午柴门日初转下床看山懒不冠山光树光浑莫辨秋风更觉
草堂深鸟雀相驯机事浅平生得处不须书爱云弄泉歳华晏

跨驴游西山天竺寺

秋叶满林吹乱红秋光半在山寺中老衲迎门解幽事一见呼我长髯公薰炉相对
坐中夕松声泉韵何冲融独鹤隔竹向人立欲鸣未鸣幽意同气酣日落豪思发诗成三
绕青桂丛造物小儿玩人世俯仰何必悲无穷布袍斗笠自高格狂歌醉叫惊山翁归来
明月散林影驴背仰啸秋山空

泛高士湖【有引】

正德乙亥孟春十四日予与石川子泛舟西湖时石川子着方山冠予戴华阳巾被
高士服把酒四望予顾谓石川子曰昔青莲居士李白与尚书郎张谓泛沔州南湖因改
为郎官湖今日予与子游颇追迹前事西湖固可为高士湖矣石川子一大笑酹酒于湖
命予作诗纪之予时已烂醉即信口长短成篇不甞易一字

我闻唐家李白一世贤郎官之湖至今传我今与子继其迹胜事岂许昔人专方冠
野服兴不浅驾船载酒凌苍烟千山万山两岸如羣龙蜿蜒尽在几席前青山落杯底白
日行舟边鼃鼃突兀波面出大鱼小鱼争避船君把斗酒我歌扣舷天风下来云叶翩翩
烂醉骑鲸游昆仑巅

春前五日大雪

一夜雪飞石径齐清晨压我茆屋低小奴开门抱瓮出赤脚汲水愁冲泥墙头饥乌
太无頼绕我阶上哑哑啼南山黄独寒无苗长镰归来风怒号

按察使刘元瑞惠宝剑歌

刘侯意气天下无惠我宝剑来昆吾腰间斜解虎头绶鱼皮纒鞘苍波羸铸炼自是
神明力欧冶已死风胡徂泰山为砥作平地东海出淬苍鳞枯星迎宝铎孤光动赤帝篆
文留其肤天地相视忽改色树木惨怛风号呼空山日暮熊兕走蛟腾鲸骇翻江湖黄云
古垒结不散寒■〈氏鸟〉啸雨愁荒芜忆昨边烽接天起關城不守失边鄙天子忧惶
费经理今虽扫逐犹未已国无守臣国之耻刘侯刘侯莫轻拟元也關中豪杰士只今契

会风尘里酒酣击剑哀歌起扬眉结义从此始万里同行报天子

谢鲍山人采松花见寄

山人缚屋黄山巅青松万株盘屋前春风摘取花满裹逢人遥寄吴门仙吴门仙人
身已轻服花更向灵气生白日独坐若木下沧海如席龙不鸣昨梦访君松树樾赤脚踏
云石苔滑天风飒飒吹欲醒归来松际留明月

钱员外画小石山歌

钱侯画石大者如踞彪小石荦确如惊虬云际十峯五峯出白日不动苍烟浮中有
山人煮石处茆屋藏缚青厓幽黄鹤飞来饮丹穴月中桂树枝相樛钱侯钱侯有仙骨手
夺造化与天侔我有仙人九节碧玉杖与侯还访昆仑十二之蓬丘

致道观看七星桧树歌

海虞山前突兀见古桧眼中气势相盘拏上应七耀分布有神会地灵千歳储精华
皴皮无文尽剥落老根化石吞泥沙据山■〈山上晶下〉崕映壑■〈含牙〉斲身枯
溜雨枝黑藏蛇伫立顷刻云雾遮日落未落山之厓同行观者皆叹嗟舌扞颈缩无敢哗
归来灵物不可究夜宿撼床恐龙斗

鲍氏藏书楼歌

鲍君藏书十万轴气压石渠吞天禄缥囊缙帙尽古今竹简蝌蚪惊触目昔从惠子
见多方后闻张华载满毂唐时世南行秘书岂独李邕号书簏今于君家尽见之插架堆
床动成束我梦化作太乙精手燃青藜访君屋纬象玄文发隐奇夜半风雨众灵哭尝闻
聚书后必兴况是鲁斋旧儒族六经行天日月明文章末学厌纷逐凤衰麟死三千春主
持吾道宁无人

题古木竹石图

石根拖雨云脚过老木■〈含牙〉斲石欲堕白日抱珥天色微翠葆含吟风势大
山空往来不见人山鸟一声山竹破当时此画作者谁湘娥犹泣真宰悲

吴伟瀑布图

何人画此瀑布图巅厓老树云模糊风前披拂伫玩久笔力乃是江夏吴吴生当世
名第一挥毫落纸人莫及骨格老硬神气清飞涛漱石石欲立悬岩远势亦可爱直泻似
是庐山派榭叶瑟瑟天风来晴沙碧屿苍茫外美人隔水把瑶草鸿雁双飞鸂■〈勅鸟〉
小天寒日暮意无极青石漠漠望中杳我生踪迹真好奇年来远结沧洲期眼中见此
足幽赏分泉煮石聊自怡

黄山歌赠戴仲良

吾闻黄山三十六峰青插天悬厓峭壁万丈飞流泉古松盘壑风吼地苍藤翠葛白
日生云烟奇石媚幽独小芝红欲然若有人兮山之巅烹霞炼石元化旋宇宙入手春无
边有时黄鹤鸣翩跹且吹玉笛桃花前月明相约讲重玄我来手持青苔篇龙汉之秘心
相传洞中一笑三千年

蟠桃图为鲍氏母寿

鲍君寄我蟠桃图缄书相示来中吴索诗咏图为母寿牙籤锦轴云光敷风前披拂
伫玩久沧海万里岛屿孤紫文绀核大于斗此木要与凡植殊春风倒卷絳罗袖酒晕时
上红玉肤云烘霞蒸光不定一颗不易千明珠昌容绿华驾文鲤王乔琴高乘白鳧摘桃
实兮来仙都飘飘蕙带云霞襦捧桃献酒为母寿三千年后游蓬壶

分歲词

去年分岁东海涯今年分岁山人家地炉盘礴笑伦父隔座呼酒声哑哑采饵钉盘
出鲜脆还从杯面分椒花吴侬相向祝如愿儿大轩冕田桑麻吾亦不祝亦不嗔但教有
酒寿吾身

题杨明府山水图歌

杨宰手持山水图打门过我声相呼登堂展图急相示云烟满面秋疎疎画者何人
得天力长风万里动地急揽衣缩颈不敢前袖中怕有波涛入洞庭之派湘汉分君山一
点入青云上有老龙吹笛处月明仿佛清韵闻黄鹤楼前花事阑黄陵庙里竹阴间沙鸥
野鹭殊可乐蹋浪翻萍时自还彭蠡两岸烟树依中有陶朱钓鱼矶饭餐鰕菜常容与手
着鱼经无是非杨宰杨宰心思聪平生爱画精天工要令知我归来处便是图中陶朱公

平厓道人歌

道人致身何萧爽缚屋青厓平如掌年来漫有云霞想道骨仙风日应长云里金支
下翠旗夜半猿鹤鸣蕙帐长生木瓢白石樽对月松醪引翠浪浩歌日暮采瑶花大泽空
山自来往

周舜卿山水图歌

周生初学盛子昭畫手相传心独劳后来却拟戴文进落笔开縑分秋毫气韵浮动
意已极挂出满堂皆动色山腰半扫云气横树杪潇潇天风急瀑布下挂苍厓间近看颇
类匡庐山又见武陵桃更有商岭芝松间似是黄与绮皓首相从同避时一朝出山回帝
力四海争看歌羽翼至今汉道有光辉对畫感事心叹息周生周生名已着平生所畫亦
无数此幅差胜盛与戴高堂白日生烟雾

黄山歌

黄山截嶭几万里乱峯如龙矗云起晨昏日月转山腰三十六轴盘地底昆仑渤澥
气势来衡岳匡庐逺相倚长年冥蒙飞烟霞白日杂沓走麋鹿玉泉丹砂鍾灵根芝草琅
玕长不死中有高人事隐栖缚屋开门乱云里崖木野藤时作花涧水泠泠石齿齿床头
木瓢白石铛檐头瓮牖乌皮几避世应同尸乡翁著书还拟鵷冠子我亦乾坤放逸人探
奇名山兴未已落日长歌招隐诗采药寻君从此始

题张玲畫

四时花张子写生人叹嗟解衣停笔思盘拏金盂倒汁墨痕斜挽回物力春豪奢风
前脉脉牡丹芽小草濺濺争含葩夏榴秋蕖取次花四时会有重帟遮不教飞泊委泥沙

请子更写古松枿清阴盘据山人家石鼎煮苓延岁华

西湖山居

道人缚屋南山里西湖正对柴门底藜杖经旬懒出门门前看湖聊尔耳秋风抚掌
桂花开坐对白石歌隐士溪翁住近不相知晨昏同饮西湖水

环溪钓处为陈宪金题

长乐山水闽中雄诸峯北来开龕嵒一溪发源深莫极环绕却与诸山逢山根倒插
溪水碧山靄冥冥溪树失鵝鸕■〈勅鸟〉啼向人四面波光山月出美人有时坐溪
边竹竿袅袅牵春烟腰间苓簪兴自好日暮吟对江花前我亦平生称钓翁十年避地沧
溟东他时倘慕三花树万里来寻烟雾中

太白山人漫藁卷三

●钦定四库全书

太白山人漫藁卷四

（明）孙一元 撰

○五言律诗

秋兴二首

白帟乘高兴青山载酒瓿登临歌猛士形胜俯南州龙卧江光晚鵬盘云色秋西湖
有狂客吹笛遍沧洲

平野秋光淨广川落日虚红留枫树晚黄见菊花初时序悲舟楫江湖无谏书南山
归卧处还喜有茆庐

渡江

斗酒醉初醒长歌望海门晚山横北固落日照中原沙白鸟双下天青江独吞壮懷
方激烈危坐欲腾鶩

看山

支郎构别业龐老遠尘寰偶到无言处来看江上山风篁元不整水鹤自飞还残日
渔樵尽柴门影独闲

读孟浩然诗

春水长兰苕春鸥来复饶云光欲到地江色澹相摇浊酒同渔父轻风动野袍岷山
斜照里归去趣鸣桡

同沈启南吴门载酒泛月二首

望望苍茫里闲云度野田山空偏受月水阔不分天酒琰初侵夜星河半在船白袍
江海上樗散自年年

微茫风日暮归鸟下青田暝色遥吞树波容澹写天豚鱼不吹浪萍叶故迎船笑杀
鸕夷子浮家不计年

登越江城寄彭济物宪副

鼓角风初曙登楼倚望时
春愁迷断雁野色带荒陴
千里云山梦十年江海诗
兵戈阻前路还系故人思

有客

草堂对湖水地僻有高情
雨意开林色秋光泛菊英
到船觅鱼蟹有客过柴荆
长日看山处相留几簟清

晓起

晓起风威急江城鼓乱挝
沙明初报日树冻半留花
末路无腾蹋孤懷有歲华
平生杜陵老烂醉是生涯

癸酉六月望夜同施邦直
棹舟西湖歷六桥抵望湖
亭乘月登孤山拜和靖处
士墓向晓南屏路相携上
钓■〈舟仑〉山根晴亦湿
湖面夜难昏月色留吹笛
鸥羣避洗樽来寻林处士
地下有知言

戎马

戎马临關塞笳声遠地哀
朝廷闻选士道路困输财
星月天山动烽烟瀚海来
安能有飞将坐扫阵云开

渔父

野水平于席中流风力微
江花迎日淨沙鸟背帆飞
黄帽为渔父青钱买钓矶
只今鸥社里投老愿无违

听泉

听泉坐厓石来洗人间烦
到面叶声乱隔林雨意喧
调高元自得道在却谁言
归路不知晚还看白鸟翻

席上沈启南先生限韵赋白荷花因柬钱士弘水部

越女起新浴亭亭立晚凉
波明吊清影露冷荐瑶觞
与月还同调无人只自芳
永言老南浦愿不嫁东皇

送杭东卿宪副入京

对面意不尽长风吹别襟
江湖浮树杪鸛鹤下秋阴
羣盗还多难诸方虑已深
治平望公等尧舜格君心

夜起煮茶

碎擘月团细分灯来夜缸
瓦铛然野竹石瓮泻秋江
水火声初战旗枪势已降
月明犹在壁风雨打山牕

謁孤山林和靖处士祠

我识林居士角巾老不妨
文章余琬琰山水借声光
老鹤迎人立疎梅作意香
谁言傍修竹配食水仙王

忆昔

忆昔云中士括囊秘命修
于菟馱醉影老剑伴清游
絶火毛三伐饮泉月一抔
十年

回首处天地隔沧洲

晚霁

晚来雨初霁烟火隔林微一径牛羊入孤村桑柘稀长天下遠水积雾带岳扉月黑
闻人语溪南种树归

月夜同施彦器毛应奎二宪副三茅方丈对饮得饶字

意极不成舞角巾醉里豪莽施悲道路山水自渔樵白月照斗酒长风吹鬓毛夜深
催击钵一笑得诗饶

月夜登台和彭济物韵

凌虚有古榭入夜月同幽桂影吹欲散水光凝不流酒杯落吾手诗句破高秋见说
卢敖在同追汗漫遊

送彭济物宪副赴阙

多难还分手秋边一剑雄青云悬短梦白日照孤忠驿竹啼山鬼江汀卧晚枫兵戈
犹在眼好奏未央宫

夜坐柬钱员外士宏

中夜不成寐屋梁落月空揽衣惊鼠散看剑炙灯红吾道空山里年华细雨中故人
有傲吏相忆兴还同

对酒

岳石韬弓剑风尘混客身易消吴地酒不见陇山春失路无腾蹋供愁似众人独怜
嵇叔夜何处可藏真

幽居杂兴十首

草堂连翠微一径转柴扉竹里厨人散雨中春事稀蜂房争自课花片觉全飞政爱
蒲团好焚香了化机

六籍聊遮眼高眠傍屋牙春来诗得计老去醉为家门映斜阳树山开背郭花邻翁
闲有约相对话河车

十日荒城雨开门草又新若无一杯酒辜负百年身澹澹春围野青青山近人喜看
江上影依旧白纶巾

野次寡轮鞅春深渐辍耕幽禽隔树小滋蔓上墙生蒲长青堪把桑空茧欲成自縁
耽野趣不是爱逃名

归卧茆檐下读书终爱贫莺声十年事草色满城春道丧悲浮俗情高梦古人眼前
君莫问我与酒杯亲

鸡声催旦暮歲月梦中移云汉空回首溪山独占奇买船同鹤载得句报僧知却笑
南华子间看野马驰

柴门春雨里野水明荒陂碧草看还长白袍闲自知短歌聊起舞扶醉强题诗元有
林泉志归来更不移

清风生瓮盎吾亦爱吾贫看竹云连屐钩帘雨映人梅花偶到座砚水动浮春意外
浑无物青山共此身

小艇初移棹摇摇进远风晴江献屿碧老树消春红斗酒长吟处百年无事中钓竿
如在手便好作渔翁

睡起不自好出门望远山碧云回夕色老木澹秋颜道路从违里菰蒲坐啸间吾师
白鸥鸟长日与同还

赠别顾华玉谪全州

桂岭经行处泉声日夜潺飞蛭晴挂树毒雾昼沉山去国鸣孤楫传诗到百蛮柳侯
读书处遗像沅湘间

江南道中

去国烽烟异怀人涕泗滂九關啼虎豹三月裹糒粮日晚渔人语云回雁路长请泥
吾岂敢晏坐恐垂堂

鹅湖费阁老见访山中作诗赠之

天远辞朝日江清一棹东艰危思欲济留滞气还雄水宿鱼龙国帆连鸛鹤风便随
梅福去莫问国师公

重游江上寺

重游江上寺相对一樽开耒耜知天力东南息战灰堞楼浮海动潮势抱山来落日
闻人语渔樵一径回

闻开化兵乱问讯吾廷介父子

问讯南来客移家近向城长贫方学道多病更闻兵顾我蓬蒿质怜君江海情续盟
定何日瓢笠祝融行

费鹅湖阁老顾与成参议同访有诗见遗依韵和答

雨余秋寺里一径转松长上客同乘屐高人独据床塔阴眠石壁鹤迹遍山房归去
犹余兴看鸥意不忘

感兴

作诗久成祟身世困天弢梦断心犹壮灯青首独搔梨花三月暮春水一帆高何处
归来好看山破白醪

江城柬殷近夫

沙上风烟异经时老客心远天低故垒落日带空林目极芳华晚愁绿野水深江城
有严武犹可慰孤吟

席间戏和近夫

江上风烟好依依俗更敦故人有傲吏唤客共清樽觅句开梅阁投壶对竹根一春
狂未了头戴小乌巾

对雪

清晨寒威作倏尔失荒陂饥乌噪欲死老鹤光自竒斜斜全傍竹脉脉政宜诗西湖
理钓艇忆得去年时

避寇吴兴山中二首

日暮渔樵散山空河汉明柝声悲永夜戎马闭孤城去国美人尽感时黄叶生酒杯
徒自好极目一沾缨

露下虫声杂蓬门月色沉灯明人按剑风急虎行林南国兵戈满中原涕泪深裋衣
挽不及卧病北山岑

简邵国贤少司徒

青鞵偶城市邂逅喜相投一笑沧江远到门拄杖留人文望吾子天意老渔舟不尽
风前兴寒花卧晚幽

寄山中相知

世间果何意一事我来无碧海分琅菜青天梦白榆笑看驴背影又落华山图欲语
无人会月明■〈彳 员〉自呼

西湖

十里山如拭西湖背郭流僧归虹外雨云抱水边楼春事多逢醉歌声半是愁独怜
垂钓者吾欲共沧洲

同董子言陈用明沈天用僧古心晚凉携榼湖上以老杜山青花欲然分韵得花字
六桥寻胜处去去望中赊树老秋连石湖酣晚映花山光酬野客诗意爱渔家归路
残阳里铿铿拄杖斜

夜过王汉章留酌

一笑真良晤相看意气同杯痕寒较浅暝色坐来空倒帙高人醉焚香秀句工阿咸
更清絶爱客似而翁

月夜过凌时东

角巾兴自好爱月访柴门幽事同吾子青山阁酒樽江风动高树野水明孤村欲问
今宵意渔歌起钓■〈舟 仑〉

宿归云庵

独坐山中寺境闲真意存瓦灯燃石壁松叶暗柴门夜久无羣动诗成偶自言上方
钟意早山月落前轩

秋夜不寐

造物终难料夜长耿不眠酒醒灯晕里秋堕叶声边盆盎乾坤梦溪山藜苳缘平生
陈正字死不受人怜

沈启南挽词

风流惊絶代投老有余情海内求诗草图中听水声人多怜蹇拙天亦爱聪明回首
荒山道斜阳草树平

夜宴

河汉近瑶席开帘空翠生金杯摇夜影
畫烛剪春声一笑藏钩戏低回舞雪轻欢歌
杂未歇澹月照三更

送许天赍赴春试

角巾快一识相对残阳红多路笑我拙收功
与子同山青去鸟外春满片帆中政恐
钓竿手畫眉终未工

剑

得自昆吾北土花尚蚀红歌鱼志终侠斫地
气何雄寒日飞孤电晴空走白虹平生
忠义在仗尔靖蛮戎

晚晴信步至城东草堂主人开樽留酌

东风吹晚步拄杖散闲身燕掠春阴薄
鳩鸣桑叶新过君文杏馆呼我谪仙人政有
烟霞骨还知麋鹿亲

毗陵李太守御贼

战格东西破孤城誓始终自挥朱雀帜众拥
紫髯公吴楚哀歌满江湖控制雄为怜
巡远义湏爱戢城风

休宁■〈彳 义〉口十咏

旗山

有美神明地青山旗势开连村看世胄继代
有贤才赤羽迎云出翠华拂日来人家
读书处高下见松梅

鼓石

平野山根出形如一鼓横何人费修琢真宰
自生成苔剥青犹好云深湿不鸣太平
有乐部还拟献承明

笔峰

山势南来远笔峰独不羣烟岚晴露颖草木
碧成文人物千年秀道源百世闻夕阳
重回首高望入寒云

砚岭

一带岭横起浑如砚琢成咸池清露滴仙掌
黑云生元气天应结人文世久明诛茆
山麓下闭户着陶泓

旴谷

谷口日升处云开万里辉遥看峯影出渐觉
露华稀地暖禽声乐泉甘草木肥端明
种松处百万已成围

云溪

落日溪光净闲来坐石矶因看异人迹犹见
紫云飞岸坼枫根出沙寒石髮稀懷贤
增感慨回首意都违

龙山

蜿蜒山脉好神物欲飞翔乱石苍鳞动千松翠鬣长地形接闽越人物自梁唐山脚
遗祠在题诗仰末光

鳳林

闻道东林竹当年有鳳鸣湿云吹不散凉月乱还明疎见晚山色遥连茆舍清岂无
逸士驾载酒寄高情

乡约

休阳万山里民物义相敦耕凿犹前古诗书自一村应看风俗厚尚有典刑存遗训
追先哲年来德业温

吟社

续代开吟社佳时剩一游思竒山改色兴到鸟深愁大雅声犹在黄初派尚留太平
风物好有句颂皇猷

荆溪道中

树夹苍厓立遥遥溪路微浪花迎棹尾山影上人衣饥鹄鸣将下颓云冻不飞还寻
旧遊处日暮渔樵稀

幽居二首

万事归来好幽居养性灵教儿收药裹留客话熊经投老丈人行生来处士星相过
君莫问身世一鱼舲

自得穷通理幽居不误身清流梳石髮远雾着山巾竹上僧留偈庭前鹤近人科头
坐终日吾自爱吾真

王方伯与时制深衣幅巾大带絢履见遗小诗裁谢

教化尊方伯能令风俗敦人文今更焕吾道喜犹存居士香山社先生独乐园兴来
风日好行傍柳花村

永嘉王子扬见访山中留酌

樽酒歌声发蓬门秋意深泉光浮野竹山气湿空林一笑得吾子百年独此心便期
同隐操更喜有高吟

山寺对雪

寒入山中寺今晨雪意逢清樽留客过野兴对僧浓别渚迷鸥影深林印虎踪此时
谁会我倚杖立高松

送吴希明

送子长杨渡白云歌未终江山情共别灯火梦还同一路黄梅雨半帆白鸟风波声
催棹急何处寄诗筒

宜兴吴克学雨中远访予于吴山一宿而别咏此送之

故人共短席相对酒杯深一宿蘧庐梦百年翰墨心雨疎分薄曙虫响起空林后夜

成相忆月明何处砧

僧明秀东林别业

结屋东林下市廛回不闻疎花寒照雨老树暝巢云摩诘元非病懒残不忌荤茆檐
兀坐处万物自芸芸

石林

乱石生寒霭残林带晚曦松凉供睡穩山静与诗宜入洞随猿迹登嵎割蜜脾謁来
天壤内此地可栖迟

同凌时东吴介夫僧古心遊虎跑寺泉头分韵得空字

长日寻幽处穿林兴不穷把杯秋寺里得句野泉中山路晴吹叶石梁晚度风有僧
同杖屨更洗世情空

失鹤六首【有引】

余蓄一鹤一夕开笼调舞忽尔高逝长望不还时松房夜寂风月清炯独引步顾影
诵唐人想伊只在秋江上之句因用首尾作诗六首付童子长歌以招之

只在秋江上孤音何处闻梦回千里月愁入万山云欲赋招难返长怜思不羣此时
还忆汝书寄武夷君

只在秋江上连宵信不通忽看云外影漫拟顶间红乐府音犹是山家笼已空此时
还忆汝学舞小庭中

只在秋江上长吟首重搔避烟茶已熟窥户月初高山角闻孤笛湖阴梦小舸此时
还忆汝把酒兴空豪

只在秋江上高飞竟不还君应怜遠汉吾岂恋区寰云冷难成梦月明疑扣關此时
还忆汝何处访蓬山

只在秋江上孤踪竟所之花间扶杖处竹外听泉时野客来玄圃山僧寄紫芝此时
还忆汝伴我夜吟诗

只在秋江上烟霞几万重阶前留堕羽苔面想行踪云影忽傍水月明犹在松此时
还忆汝跨我出樊笼

西爽亭会别周叅政杨顾二叅议

对酒山亭上清秋思更豪轻鸥动江色片雨带林皋兴逐王司马诗当何水曹分携
聊一笑日暮上渔舸

寄越中诸友

自别西湖上逃名人不闻饭甘黄独味身在野鸥羣俗病难相恼静居已策勲何时
还一笑采秀入闲云

赠郑师準【有引】

浦江义门郑师準访予山中坐次因与谈先世同居之义郑氏自宋建炎初至我朝
居已十余世历三百余年合数千指而食守宗法不坠宋元二史具载孝义传中而我朝

犹以孝义显被殊恩之盛然则举斯世之大而义之间见者仅仅若是是可嘉也亦重可叹也作诗赠之

义居闻郑氏十世浦江濱国有张公艺人传李自伦宗文今更见俗化喜犹淳海内樊篱共宁无感激人

虎丘慧上人山房

占胜景相于僧闲水竹居牕幽滋藓晕树老带虫书石鼎秋聯句溪园夜剪蔬买山钱可借许我筑茆庐

独往

无媒幽径迴笑语领东风远烧煠新绿寒花动小红野情藜杖底诗句酒杯中一路春相候何人识化工

燕都张子言访山中

有客自高格入山从我游衣裳上云色几簟枕泉流嵇叔远世味山公得酒俦柴门近湖水还可到渔舟

春日吴门和李献吉见寄二首

春水动幽兴江行人迹稀青枫随浦断远鴈与云归过雨花经眼停舟山近衣长吟愁落日霞外看余晖

漫舣吴门棹因成极胜游野吟峯影出林卧草光流帆面过江鸟云阴开晚洲狂歌聊自得随地觅岩丘

石亭

石亭围野色晏坐长高情细竹通幽涧呼儿洗王罍苍苍松雨堕冉冉岛云生扫石题诗句长留真隐名

惠山寺

高卧山中寺曹腾过午钟身间随物化意到与天通松阁云光入山泉雨气空焚香忆摩诘兴味颇相同

同顾与成叅议过蓉湖别墅分韵得禾字

龙山斜带郭树密野凉多湖气熏晴日云光淨绿禾茶瓜随地觅村径与君过伫爱幽居晚儿童竹里歌

游道场山

伏虎昔年寺塔留雷半焚我来白日静钟落青山闻乱石开云气晴池散鸟羣迟回兴不尽林叶落纷纷

雨晴

晓起雨初霁轻风到野袍日迎山气尽天入鸛羣高出涧喜新涨携僧同小舸欲留还自去诗意动林皋

钱员外施药济人遠近风动作诗戏赠

济世韩康伯辞官陶隐居花前开药裹月下检方书道骨时应长尘縁渐破除高风
动城郭人迹满门闾

寄顾台州华玉

使君有道气为政亦山中坐见桃花色青林度远风才堪一世用官与众人同饥食
菡溪橡长歌兴不穷

游龙井山

石磴攀萝上天风倚杖吟钟鸣山意动泉静树光深白日观云物清樽坐石林归来
兴更好纖月映孤岑

晚凉独坐湖上荷花盛开

薄晚西湖上花开还自怜风回香冉冉鸥泛叶田田云色晴移水月明淨放船夜凉
兴更好独坐钓丝邊

郑继之地官久不过湖上奉简

怪尔狂吟客不过湖水濱宁遭官长骂莫得野人嗔云外乌藤杖水边白鹭巾相看
只自好空送月华新

同孟僉事望之登虎丘山

停舟倚暮色开棹对江濱山回朱甍出钟鸣碧殿闻林花交野岸石壁动春云落日
狂歌客登临兴不羣

东郭草堂和王济之阁老韵

草堂临野水苔积路难分枕簟虚山月琴尊度海云■〈口答〉然真得道隐矣不
须文长日少人迹门开鸛鹤羣

兰

落日天风动空山兰叶芳潇潇湘水阔冉冉楚云长独抱幽人操空懷王者香隔江
费褰采岁暮永相望

赠黄得之二首

海内谈诗早声名高适齐风尘同仁望衣食各卑栖落日双鷗急空林孤兕啼愁闻
更出狩校猎羽林西

我爱黄江夏云山夙有期风流懷上世潇洒有清诗笑拾沧江月行歌青桂枝嵇康
德石髓王烈许从师

闻郡使者救水荒

地入鼃鼃窟天连鹅鵝羣君心时注念使节日忧勤沧海流云气青山卷浪文歲功
犹足望歌颂动江濱

简程确斋

有美人中杰名应入邵评易传殷末世文尚汉西京樽酒观羣化衣冠异俗情率溪
有长藿钓取北溟鲸

海盐陈用明朱元素僧明秀见访山中酒次作诗赠之

可人费招挽今喜过蓬门黄鸟坐中午青山意外春诗新聯石鼎兴逸逐清樽明日
还相忆来歌白鹭巾

题孙道甫东园卷

小辟东园地间来乐事宜幽怀流动处好鸟忽鸣时灌药引清沼护花编短篱主人
足高兴嵇吕共襟期

游胜果寺

偶过江上寺政遇远禅师泉石關幽兴云山进酒卮小楼围晏坐细雨好寻诗隔坞
茶烟起烧残藤一枝

茆屋清溪上

茆屋清溪上渔歌入座闻水光偏映竹钓石自生云地近青藜杖身随白鸟羣此中
有真趣长日少尘纷

寿杨氏母九十

阿母逢初度北堂风日晴花光动酒影玉笛转春声女阁清樽在华筵白髮明膝前
供笑语愿祝到云初

送友人北上

扣舷歌小海判袂送君行秋入风云壮鷗盘原野晴山迎扬子渡潮语广陵城还忆
西湖上渔歌载酒觥

题孙以德竹窻卷

窻前立苍壁坐对时萧森秋影云垂地夜声风满林寒吹拄杖湿青入酒杯深湘客
渺何许遥闻飞佩吟

赠友人之梁宋

壮志轻离别镂刀拂雪明他方正多事中原谁请纓彩裘违故国琴筑歇芳声劝尔
一杯酒出门空复情

石川子夜半相访

境静人羣絕梦回庭影空打门走狂客半夜惊山翁乌鹊霜林月堞楼鼓角风更湏
笑疎懒脱幘坐高松

宜轩为吴孟端赋

兄弟古所爱君家义仁行青春池草梦白日棣华明颖上荀文若吴中陆士衡诗书
有家学不负竹洲名

次韵寄祝维贞员外

归来光范门书策不须论白日自幽事清泉在小园鸪鸣开竹阁月晓过梅村邻父
时时回壶觞笑语温

孙万春挽词

西风起天末惊失少微星问字人初去燃藜火尚青竟眠藤树樾难起草堂灵偶过
西州路令人涕泗零

观鱼

步履石池上观鱼坐短蒲翻萍银拨刺吹浪雪模糊沙白云光淨日斜岛屿孤濠梁
相对处吾亦偶忘吾

浩啸

浩啸竹林间来过湖水湾晚花余色淨双鹤照衣闲用拙思深隐时危慚独还狂歌
聊自得随意弄潺湲

发漕河

初日浮高树清鸥散浅沙挂帆湖水上闻笛野渔家岸坼菰蒲合云迷山郭斜芳洲
动幽兴自起采苹花

歲暮

身世马虺隤索居不用媒恩多贫曝日吟苦饥鸣雷冻鹄迟迟下晴梅鼎鼎开诗书
娱此夕吾意老山隈

春日王氏池亭一首

别浦渔歌近临流水檻开主人时杖屨斜日在莓苔沙淨新篁出亭幽羣鸟来习池
风景异喜有葛强陪

大善寺赠惠上人

访客溪边寺惠休解爱才高吟时野兴小坐引春杯翠壁云光薄青林雨气开会当
忘物我相对碧山隈

过黄勉之明水草堂

去去草堂遠怀人藜杖过青林散山靄翠壁吹江波竹里鳩声切吟边野兴多相看
皆道气白日卧云萝

同吾进士谨游陈遂初湖上草堂

野径山光里草堂湖水傍开樽临絶壁岸幘俯沧浪虚渚秋光淨高云晚木凉同游
得朋旧歌罢兴偏长

饮惠宪副北屏別墅

对酒清溪上闻歌杳靄间竹光酣晚日云影动秋山好鸟移时下名园尽日闲主人
爱潇散野客不知还

寄郑继之

少谷平生友青云半载离岂忘吴地客不寄鴈门诗啸傲定何日经纶须此时后期
解朱紱同饱九茎芝

访许进士台仲九杞山中二首

山水经年别樽壘十日留柴门沙月动木榻海云流同爱名山隐难忘帝国忧何时

解朱绂一笑共沧洲

下榻山中夜论交海上村百年同意气双泪独乾坤木叶风江乱秋灯雾树昏沧洲
终自好白首钓鱼■〈舟仑〉

溪堂落成邻渔以簪笠草蓑见遗

卜筑苕溪上幽居景自賒杜陵今避地龐老喜移家石榻青霞满山樽白月斜邻翁
惠钓具云水足生涯

尚书许公挽词

四海哀良弼百年忆老成西风吹畫翬落月照丹旌相绂怀当日戎冠识旧名我为
天下念回首一沾纓

南轩下梅数花初放对酒尽日

春日南轩下数花梅已香疎枝通月色淡影接溪光忽忽小诗就悠悠孤兴长会湏
怜独立对坐领年芳

陆氏永思堂

堂在溪流上门开云树中青禽回野日黄叶引山风何日烟霞地来寻桑苧翁把酒
坐终夕回首茨门东

同凌时东邵文化沈邦魁饮戴山大石上

载酒问山寺寻幽过远林残霞依水淨新月隐杯深坐久频移石歌长得赏心青春
元自好归棹有高吟

哭吾惟可

前年近夫死今日汝云亡泉石音容外乾坤涕泪傍才名悲造物星汉失文章吾道
竟谁语寥寥孤梦长

漫笔用姑苏文秀才韵

翛然脱尘累浩汗竟何之千里云山梦十年江海诗鱼龙酣白日鸿鹄自清时着眼
观羣化长歌酒一卮

秋夜不寐

虫声破孤寐起坐转萧骚白露星河近西风鴈背高江山泣吏卒天地入旌旄老眼
苍茫外长吟首独搔

夜雨

寒柝声初急残灯焰不修长吟闻夜雨独客卧江楼节物东山念朝廷西鄙忧惊风
振丛薄迷鴈失滩洲

枕上漫尔成诗

枕上三更梦愁多记不分长天低野树茆屋带星文月色万里静江声永夜闻武夷
犹汗漫宗社想诸君

题爱日楼

高楼奉亲处 日色满檐牙 寿祝灵椿树 诗歌丹棘花 绿樽侑几席 白髮悦年华 春霭阶庭内 兰孙又茁芽

修竹亭

修竹何年种 虚亭散翠阴 清风自长夏 赤日避高林 裊裊山云净 娟娟溪雾深 地偏人不到 来往动高吟

太白山人漫藁卷四

●钦定四库全书

太白山人漫藁卷五

（明）孙一元 撰

○五言排律

出塞二首

夜出汉家城 朝来塞上行 黄金短匕首 白马纓胡纓 瀚海惊传檄 燕山暗住兵 妖狐冲队立 磷火隔原明 柳拂辕门曙 旗翻朔雨晴 笑谈开俎豆 陈列走蛟鲸 帐底饶歌起 军中杀气横 寧知谢州簿 犹是一书生

四塞黄云接 西征更北征 饥鹰掠地去 骏马跑空鸣 出碛河声咽 抱关山势横 风生闻鹳栗 月黑见欃枪 草际髑髅语 云间猎火明 旋炊白登路 暗捣黑山营 鼓角三边肃 熊羆万里行 提携玉龙起 拟死报明庭

赠李将军征南十八韵

上将元知敌 全军用伐谋 折冲临远服 仗钺下南州 天末黄云暗 海门落日愁 朱帆开远浪 画角起中洲 号令三军肃 妖氛指日收 千山迎剑气 万里拥蛇矛 风急闻哀鴈 波翻骇伏虬 舟人歌小海 幕客尽轻裘 羽檄飞前渡 艨冲据上流 候晴占雉尾 厌气射旄头 马援收诸洞 留侯用一筹 惊鳞还自溃 穷兽欲何投 杀势奔封豕 威声走怒彪 潜兵分部伍 归路扼咽喉 尚诈终防变 乞降更莫留 直须临獠穴 尽拟破蛮酋 俘献君门喜 凯还道路讴 将军列茅土 四海仰皇猷

久雨书闷十四韵

穷日闭茅屋 雨深境更清 檐眉上行蚁 墙角卧空罍 时序了长句 生涯终短檠 回风转野旷 新水涨柴荆 入梦暮云碧 懷人秋藓生 荒鸡啼远戍 山鬼啸空城 袞袞风难定 悠悠事屡更 关河成阻越 盗贼正纵横 看剑哀歌咽 衔杯乐意倾 纪纲须汲黯 諫疏忆匡衡 十载居南服 同时笑北伦 鸞雏饥欲死 汗血老无名 极目烟波阔 回头布褐轻 誓将一竿去 吾欲弄沧瀛

赠殷近夫靖江二十韵

霄汉瞻多士 君才滞一方 青袍走吏卒 白马照江乡 学与前贤翼 名应后辈光 文锋膏鸛鹄 政理卧桁杨 吴楚疮痍地 乾坤战伐场 孤城危此日 哀笛动清商 万里忧南服 羣凶睨海疆 輶轡防破取 号令极飞扬 涕为黎元堕 心应末俗伤 风云看变合 形胜认低昂

谋食同鸡鹜危身破犬羊农间留武备帝上演天潢丧乱哀孙楚宾朋忆郑庄独怜清咏苦每爱剧谈长去国烟云异故园橘柚荒土风犹未习水味只新尝鸟尽沧波阔天低落日黄子情惟浩荡吾志正悲凉岁晏舟檣阙途穷蓁莠芳犹懷西北念梦寐耿难忘

近夫雨中载酒夜访

夫子多高逸为官解爱贤冲泥山径里访我桂丛邊不废清时兴还开文酒筵寒枝通宿鹊细雨湿浮烟盘出银丝鲙诗歌渔父篇草堂元自僻华烛更成妍絕胜习池饮接

■ 〈𡵚离〉倒载还

送别彭冲老

论交非一夕去路惜匆匆鸟尽暮云碧天低落日空风尘千里别灯火一舟同句得劝杯处春归吹笛中江山我亦老天地子何穷万事已残醉百年终短篷案留青玉在剑蚀土花红客里哀王粲戎间识吕蒙昂藏各有意搔首看飞鸿

居定慧禅院

高眠云中寺道路久费攀生涯依老宿幽事遠尘寰窓晴药裹遍榻静图书环残叶下平阪荒烟翳潺湲懒久厌文字静多生道颜短童立晚吹野色上柴關境适物已化语忘机自闲门前桂应熟去去秋满山

田园卜居

明时有遗逸学稼老田园荷锄云千顷归耕月满村郊原随步履田父共开樽引水蔬成晦编篱花映门竹邊行鸟雀桑下散鸡豚晴日行看稼白头坐弄孙年丰占木德春到验梅根农事时相较岁功日自论征科吏未扰耕凿俗相敦看结田神社蹋歌笑语温

太白山人漫藁卷五

●钦定四库全书

太白山人漫藁卷六

（明）孙一元 撰

○七言律诗

吴兴浮碧亭

浮碧亭前湖水平拍檻呼酒双眼明青天不动钓丝卷白鱼入手渔舡轻悲风万里动南纪落日一望摇东瀛沙鸥野鹭少机事道人亦有沧洲情

南征

南征五月动旌旄瘴靄蛮烟望目劳此日壶浆迎虎旅几年江海泣弓刀戍楼鷗落风云壮野日猩啼战垒高更喜皇天能悔祸不妨游子卧江皋

沧江

千林草树静相依来往寻诗坐钓矶地近青春惟鸟雀夜来新水到柴扉中原落日愁多梦万里沧江定不归拟向鹿门为地主不妨常着芰荷衣

卜居一首柬甘泉山人

岁晚卜居草堂静长日晏坐人迹稀梅花不开冻云合雪片忽堕山鹊飞春杯到手
何意味江风隔岸吹客衣归来道路不须问云谷丈人还可依

春来两月懒不读书萧然无一事

少喜读书今懒读下床过午头乱蓬青山满楼晏坐处落日半江元气中看花听鸟
了物意寻诗把酒酬春工风前忽自发一笑十年梦落沧洲东

得彭济物总制书

白马行营照暮春风流文采一时尊辽阳灯火夜谈剑梁苑词人今在门闻道经时
头尽白还知百战气犹存寄书为慰南州客卧病独吟江上村

辛未中秋携张逸人僧龙玉升显东明西湖泛月吹笛饮酒登望湖亭扶醉漫兴

一望晴烟破暝幽湖天灏灏月初浮旋携斗酒呼邻父小有蔬盘上钓舟笛咽水龙
中夜冷杯摇河影万山秋人间回首悲何事欲览清光最上头

岳武穆王祠

誓死从来建大勲长驱虎旅荡边氛中原故旧今余几四海相看独有君吾道千年
元气丧皇图万里一江分至今风断黄龙府铁马犹嘶战后云

蓬牕

静启蓬牕发孤啸天风四檐吹昼晴乱石横泉自经纬幽兰老桂时争清诗书端坐
了节序山林无事完姓名夜深魑魅向人拜薜荔女萝衣分明

送彭济物赴阙

斗酒长歌赋远游客心无赖揽衣裘西风老鴈啼残夜虚馆青灯梦九州岛一路江
山随指顾万方时瘼要分忧功成天上归来日还觅沧浪旧钓俦

秋晚登镇海楼

楼上轻云散女陴楼前狂客独支颐江当夕照半添色诗与秋山两鬪奇木叶无言
时序暮尘寰多事杖藜知只应又被渔郎笑雨细风斜归去迟

新卜南屏山居

石上藤萝对夕曛解衣长日坐来频挽回沧海真无计领畧青山合有人养鹤似嫌
双口累为渔又过一生身相逢惟是南屏老独树柴门许结邻

山居着野服

道人占断南屏景十里青山带郭斜对水柴门通鹤渚隔邻烟火是渔家岩头老桧
占风雨石上昌阳阅岁华妆点太平还着我棕鞦桐帽送生涯

江上别吴廷高约明年同游严陵钓台

一曲离歌日欲晡寒云漠漠乱靡芜晚风江上人初别黄篾楼中酒漫沾冻树裹花
春有迹暮林无叶月平铺明年準拟桐江去共访严陵旧钓徒

登吴山絶顶望钱塘江潮

独倚危岑岸接■〈𡵓离〉晚潮初上练痕齐乱挝鼙鼓妖蛟舞倒卷银山海日低

弓弩千年人去后帆樯万里望中迷凭谁唤起眉山老为诵钱王庙里题

荒村

落日长风吹碛昏荒村寒月动篱门江潮枕上悲心壮山鬼灯前夜语繁乱后客身
犹万里斗间云气望中原欲添春水随行李更听渔歌起钓■〈舟仑〉

同顾九和侍讲郑继之户部顾与成正郎殷近夫县令泛太湖作军中乐酒酣赋诗
洞庭秋老翠陂陀景物恢奇望里过石柱天风回鹳鹤海门波浪见鼉鼉帆樯万里
怜渔父鼓角中流和棹歌独倚蓬窗浑不醉浮云西北意如何

赠鹤【并引】

殷近夫养二鹤每予至輒相对舞爱而作诗赠之

为爱使君双舞鹤杖藜相过水云乡入门瘦影当窗见隔树闲行共我长碧海青天
怜昨梦朱琴瑶月鬪圆吭他年结屋罗浮上万树梅花待汝翔

闻江阴解围喜而独酌烂醉

好音慰我静风尘漫喜呼儿笑语新夏武有诗歌盛代江山无恙着高人短蓑月下
形应古白酒床头计未贫安得尽闻烽火息一瓢长醉太平春

中秋夜同吴兴凌时东海昌董子言陈用明西湖翫月烂醉歌此

十里蒹葭雨尽收西湖一望月光浮野袍白帻同幽事菰米莲房作好秋波静龟龙
听醉语夜凉河汉带渔舟高情尽在形骸外不用逢人说胜游

与施邦直过南野堂访陆如昆侍御游道场山泛碧浪湖临别书此

一笑长髯意已投角巾相对草堂秋看山载酒青藜健笼鹤寻僧尽日游浮世事多
悲去鸟野人道在只沧洲他年寄迹来南墅小结芳邻水竹幽

晚晴独眺升山絶顶

石磴天风笑语清扞萝直上思犹轻断虹收雨青山出白鸟弄波斜日明迹学渔樵
成久业身随麋鹿长高情兵戈满眼真何意只漫蓬蒿过一生

避俗

避俗年来学养慵惟怜猿鹤日相从闲看流水孤筇往偶与归樵一径逢老去形骸
无长物清留门户有高松空教使者求颜阖知入云山第几峯

游西湖【有引】

甲戌秋七月十三日李叅戎汝盛南征功成着野服访一元于南屏山中既与掉舟
湖上放歌饮酒于渚蒲沙鸥之间尽日乐甚因谓西湖自坡仙逝后五百载无此乐矣今
日一元与汝盛有之为作一律以志他日有求其迹者于此亦可见云

虎旅将军功业新也来林下放歌频几年天地伤多事此日江湖合有人菱叶乱迎
青雀舫波光忽动白纶巾君王若念南征意乞与西湖寄此身

十五夜与汝盛泛舟湖中再迭前韵

西湖雨过荷气新船头对坐言笑频清樽到手有真意明月堕地延高人一双沙鸟

忽近座无数岩花吹满巾两江事业不须问来伴渔樵终此身

陪李叅戎汝盛游胜果寺酒酣登月轮峯望钱塘江潮

闲来野寺寻幽事扶醉登临兴更豪山脚遥分云树碧海门初上浪花高坐当落日
吟偏壮望入中原首重搔投老要穷奇絶处不妨随地混渔樵

赠徐廷应

老翁白首负奇好来往江湖称地仙野鹭沙鸥各解事青莼紫鳊宁论钱月明满地
夜呼酒山色半帆秋放船偶过海门访啸父相逢各诵云烟篇

乌啼

乌啼野树岁将暮满眼菴施行路艰老我祇应依白堕几人犹未识青山百年知己
长铗在万事无心拄杖闲独倚高原望明月隔云黄鹤几时还

和刘元瑞叅政夜归见寄

林下轻凉愜素裾雨晴薄暮景偏余闭门句好香残后捣药声高月上初世上风尘
元自厌山中静业未全疎他年杖屨来寻我同在罗浮顶上居

至日携搥登道场山

瞥眼风尘岁屡迁椒盘栢酒自留连半生作计闲为上到处论交山最贤好句忽成
黄叶寺小舟漫倚白鸥天松声泉语无人会独坐岩头意已传

和文征明除夜见寄

节序惊心每忆家小牕无奈客愁賒风前布褐穷难送梦里江湖鬓未华香滑春盘
堆菜甲暖分岁酒媚椒花浮云西北应还念坐对寒灯夜画沙

月波楼为陈子鱼题

危楼溪上倚层空住近仙人白兔宫浪静鱼龙眠挂影夜凉河汉动秋风钩帘弄钓
沧洲上开檻洗杯清镜中他日乘舟听吹笛我来相访水云东

王与时方伯顾与成叅议见访山中

柴门车马藩侯重下榻高谈尽日欢笑我风流丘壑相对君倒着竹皮冠山中芝草
阑干长石上松阴空翠寒记得晦翁诗句好一川风月要人看

秋日简王与时方伯

九月江南风色幽狂歌长日爱林丘酒杯且拟东篱醉汗马未收西国忧鸿鴈鸳鸯
俱自逸芦花枫叶各知秋眼中今有王夫子曲檻新开看水流

春晚归山中草堂

生涯未了乌藤杖裹足茅茨年复年报答清朝浑是句破除尘事总宜眠生来白石
仙人分老结碧山学士缘剩有一裘行带索等闲懒坐野狐禅

送李剑州白甫

发船挝鼓使君行望里连云栈阁横此日黎元犹在念十年格鬪喜初平铁堂峡绕
秦山遠玉垒峯连汉水清更喜文翁今在蜀此行须见治功成

衡门

投老衡门不用名闲云时伴一身轻床头酒尽春刚去座上山青诗又成浅水短蒲蛙阁阁澹烟修竹月盈盈凭谁为问天随子药草新生较几茎

秋夜坐吴山僧舍

夕阴一抹暗江城入夜星河浅澹明度水烟寒千树暝隔林云卧一僧清络虫故故催机杼木叶萧萧送雨声独坐山牕情自会灯花无那向人青

乙亥元旦

元旦狂歌倒竹樽东风昨夜到柴门生逢盛世忧何事家在青山道自尊残雪疎林开旧色白沙细浪长新痕春来漫有沧洲兴文■〈勅鸟〉银鸂满钓■〈舟仑〉

孟秋十六日孙道甫范文一昆仲邀予同汪进之京兆方质夫逸人泛舟西湖二首云移洲渚树回湾来泛湖光十里闲逸客风流同白帟道人诗句说青山天留晚景平波上鸥落渔家乱竹间此意与君须领畧菰蒲明月棹歌还

载酒同寻白鹭湾相看一笑意犹闲残霞隔水宜诗句归鸟度云见晚山谢氏宾朋牛者上岑家兄弟漾陂间醉歌小海无人和独与渔郎泛月还

栖云楼

楼上闲云万顷漫爱云长日倚阑干岩花半落岚光重木叶乱鸣江雨寒野老自甘泉石味儿童时进蕨薇盘闲来更觉青山好湘簾疎帘静里看

宿归云庵

沙清竹碧鸥出飞野老候余开石扉暮云卷雨日初落木叶满山风乍稀酒杯入夜意自好篝灯向人寒相依穷幽览胜乃吾事坐爱名山忘独归

送严季祥会试

遠征此日怜吾子木落苍山烟雾开挂席独看淮北月与谁同眺沛中台上林冰雪愁时暮万里江湖入梦来此去君门看献策济时须用出羣材

九日登南屏山漫兴

南屏九日登临地望里风烟秋事幽青蕊娟娟怜物候孤帆袅袅隔江洲秦云陇树归心遠易水燕山落日愁诗罢长吟还自伫汀鳬沙鴈晚相游

留周用宾宿山中

道人访我西湖间拄杖月明闻扣關焚香下榻夜初静解衣对坐神自闲眼中君似王摩诘海内我亦元次山短袍高帽意更遠同来白日游尘寰

仲冬一日闻雷有感

仲冬一日忽闻雷无乃皇天号令乖白日风云时自晦横江波浪起争豕千官不见居庸道八骏空驰黄竹哀北望何人经国计野臣孤愤泣蒿莱

题倪司谏公在竹里馆

使君家在渭川上茅堂正对青琅玕皇陂月出夜初静紫阁云连秋映寒已爱冉冉

坐中见更要潇潇吟处看闻道南邻有蒋诩携壶相过日高谈

梦郑继之

不见平生郑广文风尘侧望隔青云殊方物色偏怜客两夜灯花频梦君隔叶山鸠
高自语避人江鹤独为羣眼中此日堪惆怅塞北音书久未闻

孟金事望之载酒晚访湖上

堆案不愁簿领急青春畫舫载歌行看云湖上牵清梦对客船头洗玉觥沙岸行人
枫树黑水楼残夜月华明追随此日真高会四海相看意气横

送少谷子继之

少谷山人去不返洪河素舸坐长空一官卧病菰蒲里万里看山烟雾中海内谈诗
名已动夜深说剑气还雄關西野客应怜汝君有当年季子风

登城漫兴

独上荒城望九垓长风吹月到天津蛟鼉浪起全吞楚鸟鼠山空远见秦岁月虚惊
青琐梦江湖终要白纶巾不须更道归来好烂醉樽前软脚春

新筑苕溪草堂成

白沙翠筱净江潭新筑堂成映色寒旋有飞鳬临钓石即看浴鹭傍清湍扁舟此日
鸥夷子木榻经年管幼安长暇南邻呼酒伴一樽相对坐林峦

夜访吾舍人廷介留酌

白首相看笑语同满楼秋色坐来空瓶开美酒晚留我心到古人今有公一夜好诗
灯晕里十年旧梦雨声中故山风物浑无恙还结茅茨八九弓

游天竺寺

楼阁排空送目劳肩輿到寺步还遥古雷破碣无全面老树擎崖露半腰盛世不须
收放逸青山政尔要诗豪归来湖上东风晚带得芳鲜气未消

赠青城道士

新织鹭蓑间红羽水云随处足徜徉传来彭蠡鱼经古见说眉山帽桶长云冷听钟
寻野寺月明吹笛过江乡如今去觅玄真子还伴渔郎作醉狂

梁溪舟中遇吾廷介廷顺昆仲口歌送之

吴门北下喜相寻乍见扁舟系水浔感慨独收今日泪昂藏同露百年心高歌醉里
江湖遠白髮灯前夜雨深此去秣陵如忆我逢人还寄敬亭吟

次韵答邵国贤少司徒

岁华荏苒坐成暮江南十月叶乱投沧海放身我何意老松阅世天能留虞卿著书
只愁思杜陵老病惟孤舟几年格鬪归未得随地看云藜杖幽

吴节妇

闺门节义纲常重里巷何人咏竹洲剔目要看同此烈握符须信仰前修杼声细雨
孤灯夜虫语空堂万木秋我为题诗重起叹百年风化见皇猷

仰则堂为吴孟昌题

竹洲洲上有幽居为继先人结构初野径古梅春事旧石池孤月夜光虚当时人去
斯名重絕代堂成仰则余须信干淳经济在异时家学有遗书

郑继之新着小乌巾访予作诗戏赠

道人相见一笑同乌巾自制夸新工礼数懒慢政着我山林风流今爱公眼前物议
一时事溪邊自照双鬓蓬接■〈𠂔离〉倒载间红羽何当江上寻渔翁

望海

絕顶天风吹鬓毛长天东去望中遥沙邊烟浪浮珠牡岛上人家住翠鳌万里闲情
穷海岳百年无事只渔樵连翩尽日归来晚看到潮生月色高

十四夜月下微醺仿邵尧夫首尾吟

薄晚微醺对月圆此时意象独能传皇王有用从千古鱼鸟无言共一天好句忽成
幽径里春风初到野梅邊襟懷老大元无事薄晚微醺对月圆

把酒漫成

南窗不作裹足卧出门万里随所之寶书长剑岂无意白日高歌应自奇杨子草玄
遭客骂杜陵痛饮真吾师百年事业不须问随地看山筇一枝

率溪书院和韵

构得茅堂枕石矶矮篱匝匝槿相围通渠水暖鱼知乐隔坞梅开春有机半引短帘
供野望漫搜奇句了残晖阶前尽日无人到绿上莓苔几片衣

秋日孤山楼对酒

玄晏先生不解愁偶来湖上一寻幽健杯到手倾巴峡捷句惊人破蔡州四野秋声
酣晚日半空云影抱晴楼倚栏遥望归来处家在青山最上头

重过南屏山

白帻长歌湖水隈两年风物是重来吟邊忽漫乘高兴亭上依然笑举杯独树山花
还自照深春江燕故相回寻幽此日真吾事随意看云坐石苔

有客访予南屏山中袖出铁笛作三弄予闻而作

有客磊落江海情袖中取笛时一鸣初闻浪卷水龙咽静听铁击珊瑚声汉戍三秋
泣沙磧胡鴈中宵悲月明感时去国意无那折柳落梅能自生

樵李城别倪世亨

樵李城邊春意动与君半月喜连翩弱条丽蕊看梅柳白髮青樽且岁年交友晚逢
文举喜诸郎早得仲容贤西归他日同乘兴万里清江放舸船

幽居

幽居结构遠风尘长爱青山老此身隱几忘言真得道闭门却扫不逢人近湖鸛鹤
来终日绕屋椽篁青过邻唤起林逋同载酒六桥风月兴犹新

赠申将军制阍蓟门

青云鼓角动邊畿白日旌旗赤羽飞直免苍生忧社稷喜闻天子卸戎衣三秋瀚海
风传檄万马燕山夜破围他日功成忆孙楚江邊来问钓鱼矶

中秋夜携诸友澈墅湖泛月望海

中秋此地成高会山雨初收澈野隈望里星河舟楫近坐中沧海酒杯开月明静抱
鼉鼉出树色晴浮岛屿来烂醉狂歌真自得回头天地莫生哀

有感二首简休阳程世大

长吟独坐思冲冲回首江湖梦寐中石壁青灯悬夜雨山城画角散天风十年故国
忧戎马万里音书滞塞鸿避地风烟怜杜老草堂今寄浣花东

北风雨雪岁潇潇问舍求田意已劳去国久堪衣佩玦抚时空惜剑吹毛齐东郑泰
名应早邴下田畴气自高回首风尘今万里侧身天地一渔舸

幽居

小结幽居茗水上坐分沙草地应偏鸣鸥浴鹭春长满翠木凉云江可怜白日著书
真自适青山招隱不虚传扁舟亭上时来往独有侯芭问太玄

题程世洪栖云楼

楼上闲云万顷漫爱云长日倚阑干岩花半落岚光重木叶乱鸣江雨寒野老自甘
泉石味儿童时进蕨薇盘闲来更觉青山好湘簾疎帘静里看

忆郑继之

年来苦忆郑夫子独坐幽林兴转孤晶晶鸥羣回晚日青青菱叶散春湖何时共采
金鹅蕊此日君犹银兔符一笑沧洲终自去那堪风物眼中殊

过陈进士遂初湖上草堂

盛年射策怜吾子早卜茅堂湖水涯卧病沧洲心自得看云白日首重回鵷鵠

■ 〈勅鸟〉柴门近翠石寒沙水叶开作客乾坤吾自放终当同隱白云隈

喜雨

骄阳一雨动林皋喜极呼儿破白醪石壁青灯云色乱草堂丛竹夜声高苍生望岁
心偏切独客忧时意已劳水满前湖风日好钓丝十尺弄渔舸

草堂

溪上高秋云木凉地偏人事不相妨开门江日流书幌背水秋花照草堂塹北买田
时未就舍南种竹已成行幽居自拟王官谷药裹书籤引兴长

中秋

中秋酒醖聊乘兴南国兵戈未息机作客惯看吴地月忧时重泣楚臣衣遠江天入
星河湿高木吟回风露稀一望沧洲终自好百年只漫钓鱼矶

题范文子臞庵卷

道人黄山梅花仙瘦骨嶮嶮神苍然饮泉坐石幽涧底衣草食木青厓邊汉川风物
久作计工部家学犹堪传夜深兀坐松月静独鹤一声柴庵前

夜坐

中庭露下湿征裾独起苍茫伫望余河汉夜深人语静海门潮上月华初盛时去国
愁难破看剑烧灯气未疎三载相看隔南越故山戎马久无书

九日登南屏山漫兴

客中此日逢佳节扶醉来登千树林斜日碧云秋寺净折荷残苇晚湖深中原目送
双流泪老马时存万里心何处草堂还可借杜陵今有卜居吟

李郎中元任过别湖上

苦竹泠泠沙雨青秋风别我钓鱼汀好持使节朝天子莫道江湖有客星北固云回
山歴歴洪河龙斗浪冥冥眼中经济须公等殿上夔龙有典刑

种竹

种竹荒冈手记曾满林苍翠尽腾凌遥连野水青无间斜压秋云冷不胜惯觅渔竿
防稚子祇分拄杖与山僧黄陵歌罢无人和明月阑干只自凭

太白山人漫藁卷六

●钦定四库全书

太白山人漫藁卷七

（明）孙一元 撰

○五言絶句

江上

沙砾喧寒雨枫根挽钓楂菰蒲起烟火隔水是渔家

解衣

解衣坐渔梁水风来许许月明不见人幽篁自相语

靖江道中

落日精灵语空山旅客惊沙寒留鹭影风急走江声

钩帘

钩帘坐晚吹斗酒娱清晖幽懷未可言木叶不停飞

游吴

短褐心愈壮蒯緌歌自闻薄游吴王国来寻季子坟

孤山

谁将一拳石弃此湖水邊老梅盘拏春玩弄到何年

相见

相见不作语天风吹长须探取虎盘囊留赠昆仑图

喜晴

鸟鸣隔篱落雨脚上翠微闭门吟正苦客来为解围

睡起

睡起散幽躅荒冈春日西野云飞不起寒压竹枝低
春日游惠山以老杜一径野花落孤村春水生衍韵次第得诗十首
春色满三分梅事过其一不有载酒游白日去更疾
茅堂藏山隈寻转更幽兴一鸟浴寒塘数花明小径
石桥斜斗水竹杖行堪把隔溪鹤如人相看不知野
境静山光合门临钓石斜老翁抱瓮出清晓来灌花
半里同井臼数家带篱落溪翁留白鱼社友移新箨
向晚意不歇残阳澹欲无渔榔隔浦断樵响入云孤
闲抚溪边石坐谈竹下门残霞不作雨远水欲浮村
短策时寻句高怀自领春山禽莫相避我是住山人
卸杖坐松根觅句烟云里得意酬青山一掬野泉水
归来吟不了剩有水云情船头借渔笛韵中明月生
净业二首

熏炉爇鼻观蒲团伴法喜闭门风叶堆半月书不理
容成觉么虫盘特了一句我今无所闻结茅双松树
秋夜

道人晏坐起推窗时一吟白鹤忽不见月明秋满林
杂咏四首

夕阳没中流舟子不停橹风来未满帆望断桃花浦
云容溪上澹木叶山中稀野客青丝屨高人白板扉
雾霭湿空山招提路未分穿林人不见钟磬却相闻
尽日不见鱼风高网罟冷蹋船归未归江波荡人影
毛应奎副使隐居严陵钓台赴召小诗赠之

长风吹去棹万里客星孤何物为君赠桐江画作图
秋晚

秋晚不扃扉秋亭一叶飞采莲人不见水面落红衣
永夜

黄叶下西阪山空秋正清永夜无人语残河尽意明
避客

报客频劳鹤束书更住山从今松桂里散髮弄潺湲
偶成二首

寒日下高木照见女儿山豺虎声相闻何人当九關

■〈虫虎〉蝓斗未已攻破蚯蚓窍傍有食气翁抱膝独长啸
题孙道甫小景五首

家近新塘曲月明鱼可掬尽夜澹忘归和云汀上宿
辛苦忘平生云深出林坂短衣不掩胫行歌落日晚
秀色尽堪餐身轻意欲举日观倚高寒排云与天语
茅堂汇溪流一带清未已萍底山更奇苍烟飞不起
巾杖散高躅钩辀啼远林幽懷春冉冉日暮落花深
思贤书院十首

青龙桥

石梁无病涉杖屨时相逢昔闻横空霓今见跨水龙
清风楼

长天带川原野水映林薄倚栏吟眺余江日当窗落
学礼亭

幽亭枕溪流春风敞华牖喤喤闻笙镛礼筵陈俎豆
养蒙馆

夕阴下松间虚馆春风里夜窗灯火深儿童弦诵喜
名宦祠

絕代有新祠松篁映林麓岁时荐江蓠遗爱动民俗
乡贤祠

高议排山岳典刑犹乡土我来瞻拜余花竹映庭户
志学堂

六经立人极万古如星日游居日以深春风羣芳茁
卓然亭

日夕独往来花竹静相对身在万象间意在万象外
息游所

枕簟对青山琴樽事幽暇日夕宴坐余庭除双鸟下
漱芳亭

芳意满幽亭石池流水活沙头羣鸥来檻外双峯落
庚午九月廿五日梦中偶得

黄落献晚山枫林有余景携鹤上渔舟布袍弄江影
题孙道甫明斋

致虚本无功辐辐自一毂天根念正微吾以观其复
斋居

春日敞柴门春风来小园菜苗随意长桔槔无时言
白鳧

白鳧看不足坐买江上舟长日牵春梦江光摇绿洲

餐气

开窗见山气餐之不盈口端在阿堵中笑入无何有

濯髮

濯发泉水碧更坐洒天风麋鹿不相避同在此山中

梦游华山

半空隔风雨万壑闻长松我往采三秀骑龙莲花峯

山中

来往不逢人家在山深处独鹤忽飞来风动月中树

晚眺

洞庭落日黄虹气映林薄遠水挿山根断厓倾云脚

即景

落篷回风力移舟维石次树影散平波蝉声入古寺

乱山带乔木斜日望中碧白云忽傍人马首岚光滴

太白山人漫藁卷七

●钦定四库全书

太白山人漫藁卷八

（明）孙一元 撰

○六言诗

杂兴三首

道在须传大雅歌长再和建安天马离渥洼水凤凰饮砥柱湍

河岳英灵鍾聚星辰躔次依然化作开元二鸟启鸣大运千年

神君衣裳冶雅天人气韵高闲题首犹余甲子瓣香谁拜门间

江上

日落不闻人语江空喜动鸥羣散髮弄木兰楫乘风访洞庭君

纵笔二首

尘世功收翰墨江上还我形骸笑落风前斗笠小儿拍手拦街

细雨年华冉冉高江木叶青青万事付钓竿手一生读种鱼经

宿华阳洞

偶过金陵地肺云中坐对三峯折得瑶华独玩月明归去骑龙

○七言絶句

山人

山人住在瀑布西早晚看山情自怡屋下紫芝高一尺无数春风不受吹

醉着

瓦瓶倒尽醉难醒独抱渔竿卧晚汀风露满身呼不起一江流水梦中听

桃源图

溪上春风笑语温
溪头春水涨新痕
中原逐鹿人谁是
桃叶桃花自一村
苦寒行二首

半月闭门友朋绝
过午下食鸟雀怜
风狂高江浪打岸
雪压湿突炊无烟
冻云漏日黄无光
野客禁此手足僵
急走南村觅春信
梅花不见只诗狂
夜泊阖闾城

欲行未行风力柔
吴门挂席夜正幽
秋水半汀鸥梦我
好山两岸月随舟
忆王屋山人

几时不见鹿皮翁
回首碧云天自空
记得去秋新月夜
荳花棚下说年丰
耽酒

野人耽酒难料理
十日床头作醉狂
偶扶藜杖出门去
庭草风吹一尺长
宿江干

宿鸟不移林影静
春旗犹飏晚风虚
城头明月夜如水
江口小舟人打鱼
与殷近夫放舟江心对月

挂帆半夜受天风
白帟高歌海月中
千古闲情谁领畧
一杯今与使君同
爱竹

眼中爱竹只数根
他时留取双文樽
除却酒徒与渔父
春风长日不开门【东坡在蜀时以银竹尺许裁为双筒谓之文樽】

野夫

两山夹湖当城隅
何人能过清风庐
黄叶抱霜蟋蟀老
野夫闭门穷著书
白苧词

江上睡鸭烟草肥
江南白苧催换衣
雨声四月不知暑
过尽樱桃人未归
晚泊江村

半江黄叶飞晴雨
万里长天坐短艘
村酒瓦瓶呼渡急
石门山月去人高
寄青空道人

斗酒长歌对夕曛
相思无那隔重云
夜来梦到西湖路
白石滩头鹤是君
西湖

十里飞花送酒卮
六桥儿女蹋春词
无人会得渔翁意
独立晴湖照影时
春日书事

欲晴未晴云日黄
美人不来心独伤
漫倚东风数春事
桃花梨花飞过墙
梅杖

几点冰花尚未消
一枝鹤膝冻翘翘
夜来梦到相寻处
野水斜通白木桥
荷巾

宓妃乞与波间碧
凭仗南风为剪成
试着晚凉溪上坐
道人真得爱莲情

竹庄为孙用彰题

小筑闲庄枕水浔绕墙种竹碧森森乱红吹尽春无几借看君家秋一林
文征明为其友人伍君求作山水小幅十年甫成君求出示予因赋絶句
萤光墨色喜新增肯作寻常断壁称十载独留阿堵妙畫师谁是顾金陵
开樽梅花下候解道士夜深不至

童子洗杯恼清夜何处酒徒来更迟梅花相看眼不醉挑灯自诵山人诗
毛贞夫叅政别予笼一白鹤与丹书一函见遗即席戏成二首答之

奇格踉跄自少尘白榆花落岛中春主人应是浮邱伯不惜仙禽借与人
半世徒夸万卷功埋头今作蠹鱼虫元知天上多文字云篆烟书更不同
留许天賚宿山中

皇极闲窥天地心只容高卧华山阴枕邊鼻息君来候政是人间韶濩音
王与时方伯求予制濂溪巾兼作小句赠之

角巾一笑有真意云物相看水石间要得平生二三友天应留取卧青山
饮龙井

眼底闲云乱不开偶随麋鹿入云来平生于物元无取消受山中水一杯
奉和文征明元日见访

箫鼓迎新节事忙喜惊闲客过山房主人依旧清狂甚笑博泉卢送酒香
尝吴中橘酒戏成

大觥落手流香新醪醺葡萄浑失真祇应常在勾吴住要与木奴作主人
席上偶成

杨花燕子弄春柔醉倚箜篌笑未休依旧清风明月好买船吹笛过沧洲
秋夜

林屋无人月正明推窗欹枕睡魔轻一秋诗句知多少听尽潇潇叶上声
宿西山韬光庵

露下庭空蛄蟋鸣山深不闻长短更天风吹人酒欲醒北斗插江河半明
南窗下芭蕉盛开五月潇然有秋意

道人生意山中足养得芭蕉四五枝尽取幽凉供穩睡还分秋色与新诗
竹枝词二首

湖日初明湖水涯门前鹊鸣郎到家折得草花还自喜插向阿奴双髻了
郎到家时春正忙愿郎看蚕奴采桑去年蚕死犹自可今年蚕死愁杀郎
林侍御过访留坐竹下问武夷山水

清泉长日漱潺湲豸史峩冠访竹关自笑道人迂野性相逢先问武夷山
春暮

门开轳辘东风晓酒熟床头无可人听尽雨声浑不寐栋花榆荚过残春

渔翁

渔翁生长不识字坐对沧江有好怀不用满船载书畫一篷独挂酒篙来
约鹅湖费阁老明年同游武夷山因作短歌二首赠别

武夷山高秋意凉云阴半落松桂苍青壁无人沿月上蹋船放歌溪水长
野鹤照衣来清瀆山树开花留白云他日移居溪水上道衣同拜武夷君
谢方方伯寿卿惠米

耽贫自笑山人瘦饱饭还歌方伯贤白石铛中消岁月漫炊松火汲清泉
中酒闭门一月偶出晚步戏成小句

燕麦花开春亦移道人扶杖下山时独醒免使渔翁笑卷叶分泉当酒卮
读李世卿大匡文集二首柬乃弟立卿宪长

丰芑多才世亦雍文章犹见昔贤风天根悟处梅花早要有江门一老翁
杖屨当年谁与从白云回首有高踪畸人随化文章在我梦罗浮四百峯
访钱隐君

隐君南国旧王孙小筑茅堂水竹村我亦江湖陆鲁望钓竿独抱访柴门
西湖

门前云物时来宿沙上鸥羣亦自呼背郭不知有城府矮床竹树坐临湖
阳羨山人

阳羨山人戴鶡冠偶来白日游尘寰云霞一夜忽入梦却骑麋鹿还青山
坐竹林精舍

高帻短袍云霞光扁舟系缆野篱傍焚香静坐了无语山寺闭门春竹长
江南大水歌六首

扬子具区波势连吴门淞渚尽云烟郎家住处今何地长日挂冠愁不前
落日薄山风蹙波天吴九首海云多茫茫一望愁无那听妾劝公无渡河
日黄抱晕天风号海若鸞腾白浪摇连山浮石来喷雪恰似曲江八月潮
郤疑地轴折中流雨倒风翻不肯休飞阁横梁通海气鸣鸥浴鹭失汀洲
海侧江翻地不毛崖危石断日吞潮时闻西北犹巡狩不见东南亲射蛟
宿云积雾昼长昏滔日浮山白浪吞空道武皇塞瓠子还须神禹凿龙门
浔阳歌十首

半夜烟飞杀气横水军攻破九江城天子垂衣正南面殊方逆贼敢称兵
画舰雕戈兵势来南康已破九江摧鄱阳潏灋空愁目庐阜崔嵬作战台
安庆合围久莫摧中原保障有奇才半夜縋城三死士艨冲百万只空回
金陵龙虎帝王基石作城垣江作池此是先皇开国地留都万载莫轻窥
中丞就义身难屈宪副临危骂未休要令后代看臣节白日行天沧海流
潘鹏陷贼翻行说刘李逆谋乃助奸即日尔曹皆殄灭一时天下愧儒冠

兵戈北指犯天阍未到南都势尽奔一夜玉颜凋后舰珊瑚寶玦泣王孙
内官白面坐喧呼尽道能开五石弧临敌一时皆扑灭貂珣铁券岂应图
王公众道善提兵伍守临锋气亦横大战长江看掎角成功今日是书生
闻道君王统六师蛮兵百万羽林儿亲征若果临南徼江水今为饮马池
寻天台山水

桃花洞口流水源石梁桥畔古苔存山人遥赠金鹅蕊笑隔云光无一言
除夜

短瓶卧壁不尽饱宿火向人还自青明日梅花应作意春风一夜打柴扃

彭济物宪副雨中访予于吴山三茅观时予方醉卧分付童子未报伫久驰归既而
马上戏成一絕见寄聊复奉答

颓云压山山木黄瓦沟鸣泉檐溜长政恼门前立马岌须便水底眠知章
席上分韵同咏红梅忌绛雪胭脂丹砂霞色酒晕二首

皎皎从来忌太尤司花别处与风流就中根拨无人会眼底还将物色求
平生正尔拟相亲面着无言意更真红拂敢疑颜色似清风林下谢夫人
入天台山留别王河秀才

挝鼓发行棹相闻我在人间是离羣天台四万八千丈遥弄云泉须忆君
归来

望望江山阻且修归来泉石漫夷犹黄尘瞥眼无人见输与寒蝉自管秋
残冬廿八日立春

酒捷不堪逢过节天涯霜雪正沦阴百年我亦何为者也费椒盘菜碗心
汀上

汀上闲云收未了望中白鸟影留双乾坤此意何人画吟到无声月满江
题文征明画春江图二首

过午轻雷风色鲜断虹迎日破寒烟鸥清沙净宜诗句旧日仙人白下船
野树无人阴自合断峯隔岸雨犹青鸬鹚■〈勅鸟〉留春住正是江南杜若汀
书张山人壁

寻诗冲雪过山家拄杖铿铿石径斜自笑道人无长物酒壶随处有梅花
戏效汪京兆西湖六首为孙道甫书于湖之南屏山居

问林和靖争孤山

孤山君已占多春此日还当让后人千树梅花双舞鹤也须着我白纶巾
和靖答不允

占断孤山五百春暗香疎影句犹真六桥烟月春无数元属梅花旧主人
固争

我亦归来事隱沦山灵已许不须嗔乾坤风月无常主要有当时领畧人

和靖怒答

鹤化梅枯地自春岁时伏腊荐芳新苏公堤在犹从姓能道孤山更属人
解和

昔人丛桂歌招隐今日梅花肯见分放鹤开笼亦不恶抠衣长日愿从君
和靖许分孤山一半

西湖十里春无数夫子能来意亦嘉烟水平分相对住一山明月共梅花
山居一首僧廉一清过访作赠

过晨睡起髮鬢髻雨后茅檐树色增下榻裹巾开药灶敲门看竹有山僧
春日

晚风庭院静年芳燕子归来草正长莫道幽人无一事灌花洗竹一春忙
晨起见菊花盛开有懷青田令殷近夫

鸟下清晨日色净起开双户照花幽故人何恋五斗粟不共东篱万斛舟
李叅戎汝盛手持白羽扇见遗口占奉答

盛世何劳起卧龙山林钟鼎道还同直须着我青松下岭月溪风指顾中
长吟

落日射江江气深微云薄树生秋阴青山白日足幽事着我长吟万木林
睡起

睡起行吟日过午葛巾芒屨水云间虎头食肉非吾事要与图南分华山
梨花

露华时为洗铅妆剪剪轻风透越裳深院无人吹玉笛秋千斜搭月如霜
梔花

若为秋水淡妆成缟袂青裙似有情独倚西风弄秋影向人无语可怜生
偶然成诗

诗书伴我真多事云卧天行意自闲半世论交遍天下眼中惟觉有青山
谢安

东山已慰苍生望别墅风流太傅游醉后犹传青海舞白鸡梦断已千秋
陶潜

江山万里云无色归去柴桑日已斜风景满前非故物东篱采采独黄花
林逋

开笼放鹤空山里岩畔梅花野兴孤天子当时重封禅西湖合着老林逋
题美人图六首

斗草

草色风晴绿满坡佳人拾翠众相过衣裳带得芳鲜气一笑归来春意多
围碁

棊局当窗笑语清鴈行云阵各纵横
绡帘疎簾无人见庭鹤时惊落子声
秋千

花下罗裳映縠文秋千彩架簇春云
回头偶道金钗落深院风清笑语闻
蹴踘

宋祖英雄靖海疆蹴戎犹自意难忘
春风别苑三千处教得宫中此艺长
弹琴

翠翘云髻有风仪坐弄瑶琴日影移
性格聪明谁第一辨弦应似蔡文姬
题诗

花影亭亭日满阶凤笺象管句新裁
因风柳絮真堪拟谁有当年道韞才
睡起效赵子昂

小窗酒醒夕阳低草色撩人思欲迷
曳杖起来出门去山樱子落竹鸡啼
秋夜渡江

西风吹鬓绿■〈髟上监下〉髻击榜长歌酒半酣
野月上船灯影乱载将秋思过
江南

春晓

薄晓鸠声初睡起山光半落竹门开
清风茗椀蒲团静细雨春盘菜甲堆
诗成

短几兀言情自会一诗才就夜三更
灯青火冷不成梦残叶打窗送雨声
太白山人漫藁卷八